

BIBLIOTEKA
Zakl. Nar. im. Ossolińskich


XVII 3345




25136

2230
H. Ladrik - Stasowski





N. 1162.



M A G N I
A N T I S T I T I S
I A C O B I
Z A D Z I C I I

Elogium & Vita


A

SIMONE STAROVOLSCIO
CONSCRIPTA.



C R A C O V I Æ.

In Officina Typographica Francisci Casarij. A. D. 1644.




XVII - 3345 - III -



I L L V S T R I S S I M O
A C R E V E R E N D I S S . P R I N C I P I ,
D . P E T R O G E M B I C K I

Dei & Apostolicæ Sedis Gratia,
E P I S C O P O C R A C O V I E N S I ,
D V C I S E V E R I Æ .
S I M O N S T A R O V O L S C I V S . S .

 E mortalium gesta celebri
& perpetuâ memoriâ sem-
per digna, temporum de-
cursu queant in dubium aut
obliuionē adduci, operæpretium viri
sapientes putarunt, Illustriss. ac Reue-
rendiss. Princeps, ea solidioribus quàm
saxa, calx, aut arena, literarum monu-
mentis, imò & testium adnotatione,
memoriæ commendare æuiternæ.
Quorum præcepto, ego quoq; bene-
facto-

factoris mei desideratissimi, Tui autē
in sacro Senatu Collegæ, & in Cathe-
dra Crac. Antecessoris digniss. Iacobi
Zadzicii, res præclarè gestas & vitam,
sequētis æui memoriæ traditurus, Tibi
eius amico ex assē, similibus in Rep. &
Ecclesia Dei muneribus, similiq; pru-
dētia & probitate persurcto: & æquē
vt ille fuerat, iuris Ecclesiastici defenso-
ri, à gratia, terrore, voluptatum il'ece-
bris & aduersis inuicto, adq; beneficen-
tiam nato, dicare & sacrare volui. Vt
quemadmodum ille è Gembicii manu
(Patru videlicet Tui, Primatis Polo-
niæ, perpetua animi æquitate & cōstan-
tia domi forisq; clarissimi) totius for-
tunæ suæ initia & progressus accepe-
rit, atque moriens tabulis testamēti, fa-

mam

mam suã & decus, Tibi Gembiciorum
apici, & in Pontificatu certo ac desti-
nato successori, tuendã ab iniuria Mo-
morum commendauerit, ita & scri-
ptum istud, tuo patrocinio, vnã cum
autore iure merito cõmittatur. Nam
& opus ipsum, vt facilẽ prospicio, mul-
torum obtrectationi expositum, ad-
uersus liuidos malignè pleraque inter-
pretãtes luculentissimo indiget defen-
sore: & ego ab obitu illius omnibus de-
stitutus fortunis & spebus, liberalissimo
Patrono. Quemadmodum igitur ne-
mo superest, è tot Proceribus Patriæ,
qui Te ipso, consiliorum omnium, re-
rumq; ab illo gestarum locupletior at-
que viuidior testis esse possit, quem ab
ineunte ætate nosti: ita nec me rerum

fidei in hac narratiuncula innixum, ma-
iori quis authoritate fulcire poterit,
quã tu Herus meus & Pontifex, cuius
ab ore & voluntate pendeo. Debes ita-
que hoc supremum defensionis munus
memoriæ tanti viri, à quo tot docu-
menta exactæ disciplinæ Ecclesiasticæ
haud minus, quàm à Patruo Tuo te di-
dicisse profiteris: & mihi patrocinium,
quemcum reliqua Dioecesi in tuam iu-
risdictionem & tuitionē accepisti. Iam
verò, quod aliud Zadicii Manes usu
nobilius officium à te amico & succes-
sore suo exoptulant, quàm vt eius glo-
riæ obtrectatores, si fortè existant, ea
fidei constantia refutentur, qua viuum
& meriti honoris laude florentē colui-
sti: haud ignarus, quod præclara veri-

tas,

tas, quamuis omnimodè à maleuolis
opprimatur, supra calumniæ attamen
nebulas facilè emicat: & qui fide inte-
gra bonos mortuos coluit, viuos cõci-
liat. Sic quia non minori momento scri-
bentis fama, quàm agētis industria æsti-
manda est, me quoq; virtutum tuarum
cultorem & miratorem, eadem tutela
comprehende, & ab iniuria maleuolo-
rum protege. Vt & magni Zadzicii Ma-
nes, qui purissimo iam in æthere & in fa-
ma hominum perpetua gloria perfru-
untur, Tuæ mirificæ pietati plurimum
debeant; & ego olim cliens illius, tuis
nunc clientibus adnumeratus Gemb-
cianam deprædicem beneficentiam.
Profectò enim & tuæ famæ hinc non
dubia imortalitas prudentum iudicio

attri-

attribuetur, & magnus eorundem cal-
culo Zadzicius non facilè interituram
laudem & gloriam apud posteros asse-
quetur. Cuius ego vitã ante alios, lite-
rarum memoriã ideò commendandã
existimaui, vt clarissima perfectæ virtu-
tis exempla, quæ in sacro homine, eo
maiori lumine resplendent, imitanda
posteris traderentur. Quanquam nec
reliquas Sarmatiæ nostræ partes, forti-
bus & sapientibus viris, atq; omni ciuili
bellicaq; laude dignissimis adeò effoetas
arbitramur, vt in iis veterum Ducum,
Præfulum, ac Senatorum, qui cæteros
quondã omnium ætatum ac gentium
haud dubiè veræ virtutis gloria supera-
runt, sobolem penitus interiisse pute-
mus. Verùm & in hoc quoq; viro, li-


be ra

beralium artium disciplinis, pietate ani-
miq̄ue moderatione longè anteferen-
do, perquàm multa reperiuntur, quæ
futuris olim ciuibus placebunt; & quæ
non modò in hac vrbe Metropoli, vbi
angusto loco eius ossa cubant, sed toto
terrarum orbe, religiosa cum venera-
tione, omnis posteritas admirabitur,
si Tibi vni Princeps Illustriss. ac Reue-
rendiss. virtutum illius spectato testi,
familiaritateq̄ue maximè coniuncto,
hic ingenuus meus labor dicatus o-
mnino placuerit. Vale Præsul Am-
plissime, & Ecclesiæ, Reipub. nobis
clientibus, diutissime Viue.



B

Lectori



Lectori Beneuolo.


Nsignem ingenio Virum, dignatione clarum, doctrina & prudentia admirabilem, ut qui ingentibus olim virtutibus suis, magnorum virorum amicitiam, Serenissimorumq; Regum suorum gratiam meruerit, & in Republica officia maxima gesserit, Patriæq; nostræ immortale contulerit ornamentum, Iacobum Zadzicium, Antistitem Cracouiensem, Tibi Lector beneuole rediuuium statuo. Natum in Satrapia Siradiensi, in pago Rzechta dicto, claris quidem natalibus, sed patrimonio tenui: quod ille tamen facile sibi meritis & ingenio auxerat, ad quæuis munia Reipublicæ aptus & impiger. Et ut verbo dicam, ex omni virtutum & ornamentorum genere concinnatus; siue spectes in tanto rerum fastigio, quod attigerat, comitatem etiam infimis obuiam: siue in tanta rerum affluentia, quam acquisuerat, spontaneam victus sobrietatem: siue in tantis negotiorum undis, quas Regio ac Reipublicæ nomine tractauit, perpetuam animi tranquillitatem (id quod diuine cuiusdam mentis esse videtur)

tur) siue sincerum erga pietatem ac religionem affectum, quam semper summo studio, nullo supercilio, tum docuit, ut pastor, tum prestitit, ut Presul Catholicus. Nunc felix illa anima, sicut Ecclesie preclarum lumen fuit, ita caelesti Hierosolyme sydus illustre addit. Nos verò tanta virtute orbatì, non aliunde iusto dolori patrie leniendo, medellam querendam esse putauimus, quàm à frequenti & diuturna recordatione preclare factorum illius. Scilicet, ut posteri diffusè intelligant, quantum Zadzicius virtute animi, pietateq; prestiterit: nec è titulo tantùm marmoribus inciso, sed è perpetuis actionum omnium annalibus Christiane vite exempla, sacratis presertim hominibus petantur. Optimiq; Senatoris nomen, non in Polonia modò legatur, inclusum scilicet angusti vnius edicule spatij, verùm etiam ubiq; terrarum Latina voce celebretur. Cuius rei gratia, hoc munus eo propensiore voluntate suscepi, quod non aliter, quam sic, id est gratissimo animo acceptum ab illo beneficium, veluti debitum memoriæ pijsissimi Antistitis persolvere videbar. Et iuuabat sanè ea mandare literis, quæ ipse in eius aula, & ut ita dicam contubernio intimiori versatus, familiariter ab eo didicissem. Tusi virtutem amas, lege & imitari stude.



A P P R O B A T I O.

I Deam boni Principis in Vita Illustrissimi & Reuerendissimi olim IACOBI ZADZIK Episcopi Cracouiensis, Stylo puro & candido ab Admodum Reuerendo Domino Simone Starowolski, Cantore Tarnouiensi, expressam testatur M. IACOBVS VITELLIVS in Academia Cracouiensi RECTOR atque vt in lucem prodeat, facultate ad hoc sibi data, concedit. Datum ex Collegio Maiori 31. Maij, Anno Domini 1644.



MAGNI ANTISTITIS
IACOBI ZADZICII

Elogium & Vita.

P R Æ L O Q U I V M.



VI pace & bello gloriam consecuti, præclara ingentium facinorum exempla imitanda aut vitanda posteris tradiderunt, eos omnium oculis ac linguis publicè proponere calamo depictos, vetustissimus tam Græcorum, quàm Latinorum mos fuit. A quibus reliqui deinde populi quaquaversum, vt scientiarum præcepta, bellandique modum, sic & virtutum, honestatisque normam, cum tempore de-

sumpsere. Quinimò & nostri Sarmatæ, vna cum fide Christiana, literis ab eisdem acceptis & Philosophia, magnorum virorum, & excellenti virtute præditorum laudes celebrare, fero equidem didicerunt; ast apprimè vtile esse vitæ hominum & necessarium, vel ab inde statim censuerunt: vt & illis quos tantoperè suspiciebant quoad fieri potest, pro meritis suis gratia referatur, & cæteri habeant, vnde virtutis & laudis exempla petant, & quo ad benemerendum de suis incitentur. Nam quemadmodum equum in cursu plausus agiliorem generosiorémque facit, cum alios circa, vel ante se glomerantes incedere videt: sic optimam cuiusque indolem, laudes & approbatio iuuant, si eodem virtutis cursu quo cæteri magni viri incessère progrediatur. Proinde, cupidinem excitare volentes, currentibus impetu honesto ad gloriam veræ virtutis, clarissimi olim in patria nostra Senatoris, pijsissimi que Sacerdotis Iacobi Zadzicij vitam (cuius pietatem Ecclesia, Zelum religionis Hæretici, protectionem Clerus minor, beneficentiam egeni, candorem ciues, virtutem hostes, fidem ac prudentiam tota Respublica, Serenissimi que Reges perspexerunt) solidis literarum monumentis commendare statuimus,

mus, vt habeant futuris sæculis, tam Sacra-
ti homines in Polonia nostra, quàm ciuili-
vitæ studiosi, à quo in vtraque Reipub.
fortuna exempla sumant, ac quasi
stimulos quosdam, ad honestas actiones
& laudabilem imitationem. Quamuis
sciam non deesse in Historijs nostris,
multò vberiores patrum ac proauorum
nostrorum laudationes, quæ superstitibus
ad bene beateque viuendum viam com-
monstrare, ingeniumque abundè exacuere
possunt. Reticere attamen ea, quæ
& ad augendam tanti viri gloriam, &
ad inflammandos ingenuorum animos
spectant, improbi prorsus ac flagitiosi
esse hominis putauimus. Cum ex omni-
bus virtutum præmijs quisque honestus
ac optimus ciuis, non aliud sibi præ-
mium exoptet, quàm nominis sui apud
posterorū famam immortalē: præser-
tim qui omnem operam, omne studium,
omnesque cogitationes suas ad constabi-
lienda Reipub. commoda attulerat.
Alias, detrahit patriæ maiestatem
suam, qui præclara & fortia ciuium
facta, quæ in luce collocari cupiunt,
silentio prætermittit. Quapropter
ingentibus naturæ dotibus, & virtute
eximia præditum Antistitem pro-
meritis laudibus ornaturi primùm
de generis nobilitate ac familiæ illius
vetustate differamus.

C A P V T I.

De origine & vetustate Korabitarum.

Korabitarum profapia & nomen, tametsi multis ante annis in Polonia illustre fuerit, plurimique Proceres ex ea domo in Senatu floruerint, certam attamen stabilemque nunc primum Ioannis Lascij Gnesnensis Archiepiscopi ac Primatis Regni Poloniae, fratrumque illius virtute claritatem accepit. Longior vetustas & origo, haud plane inuestigari potest, propter maiorum nostrorum simplicitatem, literas politiores tunc minimè callentium. Qui veteri Sarmatarum consuetudine, nosse & formare literas contenti, bella ex bellis ferere, armisque sibi gloriam parare consueuerant: adeò, vt priuatos inter, ille clarus & nobilis haberetur, qui plures ex hostibus interemisset. Post susceptam verò fidem Christianam, primus Korabitarum in Polonia floruisse legitur, Robertus Episcopus Cracouien. Anno reparatae Salutis quadagesimo primo, supra millesimum atque centesimum, ab Innocentio II. confirmatus, & Ioannes Radlicius successor deinde illius.

Korabitaë autem dicuntur, ij nobiles, qui pro insigni

signi nauim onerariam (Slauonica lingua Korab dictam) absq; velis cum malo vnico gestant, depictam in planicie rubea, ad proram & puppim, capita leonina, fului coloris, habentem. Quo stemmate, complures herclé familiæ in patria nostra, antiquitus vtuntur; & à pagis aut villis hæreditarijs, diuersisq; euentibus, diuersimodè cognominantur.

De Zadzijs verò qui itidem hoc stemmate, Korab nuncupato vtebantur, primus literarum monumentis inuenitur commendatus, Petrus Zadzik, de magna Poradouo. Hoc est, hæres & possessor villæ sic dictæ, & in Palatinatu, seu Prouincia Rauensi sitæ. Qui domi & foris prudentia clarus, in vicinam Satripiam Siradiensem, habitationem transfulerat: exque Drusbinsiorum profapia coniuge sumpta, Albertum vnicum filium susceperat, linguæ Arabicæ peritum, militiaq; bonum. Atque ea ex causa Diuo Sigismundo Augusto Regi Poloniæ probè notum, & in Thraciam sæpiùs missum.

Is deinceps è Puczkowna honestissima fæmina, & claritudine maiorum suorum illustri, duos filios reliquerat. Alterum Stephanum honore & officio Tribunatus Siradiensis conspicuum, liberorum deinceps exfortem. Alterum Ioannem, virtute magis,

quam amplitudine opum, maiorum suorum gloriam
exæquantem : qui fuit pater Iacobi Zadzicij, Antifti-
tis nostri, quem laudandum suscepimus.

C A P V T II.

De Parentibus Amplissimi Anti- stis nostri.

OMnibus fanè ciuili prudentia perpolitus liquet,
non parum ad bonam indolem conferre, si
quis eximijs, & quidem vtrinque parentibus fit pro-
gnatus. Nam quo quis nobiliori stemmate prodijt,
eo clariore indicio animi rectitudinem in illo præ-
fulgere censemus. Nostrique Antistitis parentes, &
Catholica religione, & domestica disciplina inter vi-
cinos atque cognatos floruisse, constans est omnium
Siradiensis Palatinatus incolarum assertio, quos illi
sibi & humanitate innata, & liberaliori genio ami-
cissimos reddiderant. Ioannes igitur Zadzik sum-
pta in matrimonium Heduigi, filia Borssæ viri nobi-
lissimi, duodecim ex ea soboles pari vtriusque sexus
numero progenuerat. Sed quorum ex ordine tres ab
ortu ipso famellas, Parca inhumanior præcociter
humauit:

humauit: tres verò reliquas, paulò prolixiore lucis
 vsur a frui, vel inuida concessit. Quarum prima, no-
 mine Anna, Alberto Sarnowski Vexillifero Palatina-
 tus Lanciencensis, in coniugem data fuit. Altera Ca-
 tharina, D. Francisci Sororibus de Obseruantia Cra-
 couiæ adscripta, Teressia nomen in Religione acce-
 pit. Tertia, primæ matris nostræ Euæ nomine insi-
 gni ta, Senatorio viro, Ioanni Louicki, Castell. Ino-
 wloclauienti elocata vixit.

E mascula verò prole, primus fuit Matthias, na-
 tura ad Martem formatus, & qui bellum cum Mo-
 schis Sigismundo III. Rege Poloniae gerente, in vrbe
 Metropoli Moscouia editis fortibus factis ante ocu-
 los Ducis sui Alexandri Zborouij, in acie occubuit.

Secundus erat Remigius itidem patrio more Bel-
 lonæ sacratus, qui ante virilem adhuc ætatem Ca-
 menecij in Podolia vitam finiuit.

Tertius Hieronymus, qui dum literarum flosculis
 iuuentam adornare conatur, ad nobiliorem supero-
 rum speculationem iuuenis transit.

Quartus Stanislaus, ab ipsa pueritia spretis mitiori-
 bus Camænis, armorum strepitum in Moschouiam
 secutus. Quo bello finito, dum Leopoli in Russia,
 emerita stipendia cum cæteris commilitonibus præ-

stolatur, ad caelestium exercituum castra, æternam remunerationem accepturus, maximo cum mærore parentum euolat.

Quintus Ioannes, titulo Vexilliferi Prouinciæ Si-
radiensis decoratus, cum & castra bellica, & diuer-
sas exterorum regiones perlustrasset, atq; exinde cha-
rus omnibus in Regia Sigismundi III. fuisset, tandem
connubio cum Theophila Kretkouij Palatini Bre-
stensis filia, felix sibi videretur, inopinato præmatu-
ra Fatorum sæuitia, ad meliorem vitam translatus
est, prole nulla ex se relicta.

Sextus demum Iacobus, Episcopus Cracouiensis,
quem Elogijs ornare destinauimus, vel ea etiam de
causa quod ipse vltimus familiæ suæ Zadzicianæ pe-
riodum clauserit, postquam supra opes vetustatemq;
originis, & domesticam disciplinam, noua decora,
& augustiora quidem intra penates, nequaquam par-
ta ludentis fortunæ temeritate, sed grauissimis quæ-
sita virtutibus intulisset. Hunc cum nescio quo au-
gurio mater ad ingentis spei fortunam edidisse videretur, rara nunc inter matronas charitate, proprijs
vberibus aluit, adultumq; vsque adeò diligenti & pla-
nè virili cura honestissimis moribus instituit, vt Sta-
nislauus Varficius Auunculus, Castellanus tunc Var-
saviæ.

fauientis nescio quid egregium & verè magnum in pueri indole se conspicerè fateretur. Nec eum sua fefellerat opinio; siquidem in eum ab admirabili quodam siderum concursu, cuncta postea humanæ felicitatis ornamenta virtus & fortuna contulerunt.

C A P V T III.

De eius Institutione.

Rectè sanè Laertius censebat, ea discere iuuenes quæ vitis factis vsui futura essent. Ex bona siquidem adolescentum institutione omnes, aut certè potissimæ commoditates, tam Religioni, quàm societati hominum nascuntur. Quapropter non quibuslibet Magistris præclara ingenia sunt committenda, sed omnium, quam haberi possint optimis & præstantissimis; à quibus facile discerent, in animo temperantiam, in lingua silentium, in vultu pudorem habere: quia aliter bene viuendi artem, difficillimè assequi poterunt. Iacobum verò nostrum ab ineunte statim ætate, adeò graui, excelsoque ingenio extitisse ferunt, vt perspicacissimi patriæ ciues, (quorum ea ætas admodum ferax fuit.) eum ad omnia summa natum esse iudicarent. Igitur Calissium, ad

scholas Clericorum Societatis Iesu, à parentibus datus, humaniorum literarum principia auidè hausit & pietatis. Postmodum ad Academiam Cracouiensem missus, excoluerat se pertinaci labore, toto ferè quinquennio, cunctis ijs artibus & disciplinis, quæ homines vera virtutis gloria perbeatos ac dijs similes efficere consueuerunt. Sed quemadmodum agricolæ, qui plantaria habent, nouellas stirpes transferre & transferere è natali suo solo in aliud solent, vt laxius lætiusq; crescant: sic Parentes Antistitis nostri, de indole filij sui iudicantes, suasu & sumptibus, ex parte eximij in Repub. viri Stanislai Varficiij Thesaurarij iam tunc Regni Poloniæ, affinis sui, in Italiam eum ablegarunt, ne genitali solo affixus sterilisceret quodammodo, inter pares sibi otio & voluptatibus deditis, sed in aliud aliudq; traslatus solum, robur & incrementum sumeret in scientijs, & succresceret in virtute. Excitatur enim animus, & nescio quomodo maior seipso fit, conspectis toties nouis moribus; hominibus, locis; inflammaturq; ad sublimia quæq; visa sæpius cogitataq; aliena virtute & gloria, incurrentibus in oculos magnis illis magnorum virorum Manibus, fortibusq; fortium ausis.

Perusij itaq; sedem sibi deligit, Astreæq; totus ferè

ferè deditus celeberrimos Academiae illius Professores Iuris integro triennio audit, vna cum Stanislao Lubinio, Episcopo deinde Plocensi, morum elegantia, vitae splendore, monumentisque ingenij, ac doctrinae clarissimo, & Catholicae religionis egregio dictis factisque assertore ac vindice, quo tunc æmulo in artibus humanioribus & Iuris scientia familiarissime utebatur. Sed & Doctoratus insignia simul cum illo accepit, profectusque Romam pietate imprimis eximia cum probatissimæ vitæ Sacerdotibus certabat, quod ipse Clericali habitu indutus ad Ecclesiasticum iam ordinem adspiraret: vitæ quoque temperantia, honestate, doctrinaque cum optimis Philosophis contendere erat solitus, magnitudine verò animi, iudicio, prudentia atque humanitate, vel spectatæ iam ætatis venientibus ad Urbem patriotis æquabatur. Enitebat enim satis maturè in adolescente ingenium alacre, præaltum, ardens, & vt in iuuenili feruore satis graui prudentia temperatum. Accesserat corporis atque oris dignitas maximè excellens, quæ & in senili deinde ætate potissima illi causa assequendæ & retinendæ vbiq; authoritatis fuerat.

C A P V T IV.

De Statura corporis illius.

Proceres in Rebuspublicis ab antiquis appellati sunt, non solummodò inde quod celsiore dignitatis loco positi sint; sed quòd vetustissima etiam barbarorum omnium consuetudine ad eiusmodi dignitatem procero corpore & digna imperio forma viri eligerentur, vt diuersis in Historijs videre est. Proinde & Zadzicium nostrum non modò animus ad quæquæ sublimia natus commendabilem in Patria reddebat, sed vultus etiam ipse, & statura corporis erecta excelsaq; supra mediocrem, macro habitu potiùs, quam succoso, satisque validis artubus à firmissimo quodam neruorum nexu. Erat facie rubicunda, hilari, oculis radios & iucundis, licet supercilia pilosa prominere viderentur. Nasus à medio elatus, nec aduncus tamen, labra decentia & candidissimi dentes illud os probum effingebant, quo adentes facile alliciebat ad se. Namq; eloquentia fuit illustri exquisitisque literis condita, & cum oporteret ad iucunditatem exornata, adeò vt cum omnibus magnopere placeret, etiam sibi meliore fortuna dignus

gnus videretur. Inerat etenim lato pectori patulisq; humeris militare decus, ni castra spiritualia ab adolescentia adamasset. Quare à prima iuuentute statim erigebat animum ad gloriam anhelantem in spem consequendæ laudis, in patriamq; è peregrinatione reuersus, vix salutatis suis, protinus in Regiam se contulit, & magnorum virorum lateri semper adhæsit.

C A P V T V.

De ingressu illius in Aulam.



Ingeniosa cuiusq; Aulici virtus, summa ope adnititur, vt quamplures Aulæ proceres amicitia complectatur. Inter illos verò præcipuum aliquem qui honoratum gratiæ locum apud Principem tenet omnibus quibus potest, officijs sibi demeretur. In patria autem nostra Cancellariorum lateri vt plurimum adhærere solent, qui sunt duo Supremi, Poloniæ alter, & Lithuanianæ alter: ac totidem Procancellarij, alternis vicibus sibi succedentes ex ordine Ecclesiastico & militari. Siue igitur sæcularis vitæ studio quispiam sit præditus, siue spiritualis, in horum amicitiam sese ingerere curat, qui emergere ingenio

in Repub. cupit. Qui verò militari ausu fortibusq; factis inclarescere desiderat, duorum itidem Summorum Imperatorum Regni Poloniae & Magni Ducatus Lituaniae comitatu sese inferit, vel eorum Legatis, qui vulgo Duces Campestris vocantur.

Et Zadzicius quidem, quod sacris iam initiatus esset, nec pro more gentis dirum ei Martem sequi cum reliquis fratribus liceret, ad Matthiam Pstroconium Premisliensem tunc Episcopum, & Regni Poloniae Supremum Cancellarium se confert, eodem Auunculo suo Stanislao Varficio Thesaurario Regni promouente, cuius maximè sumptibus peregrinationem suam ad exteras nationes peregerat, ad mercatum bonarum artium & probitatem morum missus. Igitur à Pstrokoncio benignè susceptus, adscribitur statim familiae inter honestissimos ob indolem ab omni virtutum concursu gratissimam, qua ita pijsimi illius Antistitis animum oblectabat, & eruditis moribus ceperat, vt inter carissimos emereret, & Aulicis omnibus in honore esset atq; amore, Patroni sui beneficio inter Regios Secretarios adnumeratus. Sed singulari amicitiae nexu, deuinctos sibi habuit Lubinios fratres, Stanislauum in Iurisprudentiae studio

dio suum æmulum, de quo supra diximus, & Matthiam natu maiorem, qui nunc Superum nutu ad Primatum Regni Poloniae euectus, Gnesnensis Archiepiscopatus culmen & Reipublicae tenet, morum grauitate & innocentia conspicuus. Tum Ioannem Wezyk, eodem itidem Metropolitano honore & Principatu in patria ante Lubinium primario, praeter insignem in vtriusque Iurisprudentiae laude praestantiam, omnis politioris doctrinae cognitione ornatissimum. Qui tempore Interregni, Diuo Sigismundo III. Rege Poloniae ad caelos euocato, mirum vigilantiae, prudentiae & integritatis specimen dedit, atque varijs in negotijs Reipub. probi viri, optimique Senatoris munere egregie perfunctus est. Horum amicitia Zadzicius vti iuuenis tunc caeperat, ita constantissime tota vita vsus est.

Transeunte vero Pstroconio ex Cancellariatu ad Episcopatum Vladislaiensem, Romam ad obtinendas sacras literas, super Episcopatum illum, ab eodem missus, negotium feliciter expediuit; deditusque lectioni Politicorum librorum, Eloquentiae, Historiae, atque Iuris Canonici, in Curia Romana praxi continuae, eam sibi doctrinam & prudentiam rerum compa-

rauit, qua in Patriam reuerfus facile posset omnem inuidiam in Regia superare, & crescere gradatim per quosuis Reipub. honores.

Redux igitur in Patriam, ad Laurentium Gembicium, qui Pstroconio in Cancellariatu successerat, rectè se confert, gazam ingenij sui exponit, ad omnia promptus, ad omnia habilis. Literas enim scitè atque expeditè exarabat, dictabat eleganter, in omni- que occasione iudiciorum, & æconomicarum rerum cuncta ad iustitiam, pietatem, ad decus temperantiamque vti Aulæ iam artium peritus reuocabat: quibus maximè rebus ita appetente, non Cancellarij modò sed Regis quoque Sigismundi ingenio certissima laus pararetur.

Nec multò post, cùm in ea domo aliquandiu virtutis eximiæ, perurbanæque comitatis & naturæ nequaquam fallacis vel insidiosæ, testimonia passim reliquisset, Gembicio præalta semper agitant, in otio pariter, atq; negotio comes esse cæpit. Adeò, vt Sigismundo Regi tunc ad Smolenscum cum exercitu hærenti, per illum literas secerioraq; Reipub. negotia tractanda transmitteret. Vbi dum extra ordinem necessaria Regiæ Cancellariæ officia cæteris lan-
guen-

guentibus, aut occupatis cura Castrensi diligenter impleret, abnuenti semper & coacto similis, ne ambitione potiùs quàm obsequio aliena munia suscipere videretur. (Maiori tunc Secretario Regni, alijs occupato, æggerimè id ferente.) A Rege ipso sapiùs negotijs adhibitus, cùm literas quaquæ hebdomada à Gembicio ferens sese vltro insinuaret, & Secretarij Ordinarij titulum, promouente Stanislao Varsicio Regni Supremo Thesaurario facilè adæquans, dextrè omnia, & maxima cum diligentia perficiebat.

C A P V T VI.

De adimplentione officii Secretariatus.

Vetus monitum Aulæ, sed verissimum Themidem & Suadam colas: hæc te virum, illa ciuem faciet. Quod vtrumque Zadzius præoculis habens, vtraque in arte omni conatu proficere adnitebatur, cui naturæ dono, admirabilis ingenij captus, & memoria rerum omnium erat singularis. Legendi quoque ac relegendi oblata quæque, & præaltos etiam codices absque vlllo fastidio avidissimus æquè

ac patientissimus fuit. Qua sanè re non Gembicio modò, viro facundia ingenijq; acrimonia claro, tum patriæ cultu ac religionis obseruantia pientissimo, cuius negotia apud Regem agebat, charus semper extitit, sed omnibus ferè Dynastis & Proceribus qui cum Rege in Castris fuerant. Igitur pro more & officio Secretarij, post expugnatum Smolenscum ab ipso Rege ad Conuentum nobilitatis Maioris Poloniae Nuncius Sredam missus, quod omnia ex voto confecisset, priusquam ad Regem salutato per viam Patrono suo Gembicio redijisset, inter Prælatos Ecclesiæ Varsouiensis Custodis titulo adscriptus erat. Et paulò post à Stanislao Zolkieuiio Supremo Regni Poloniae Exercituum Duce & Cancellario (qui ei honos, Gembicio ex Episcopatu Vladislauensi ad Archiepiscopatum Gnesnensem promotus, in præmium debellatæ Moschouiae recenter à Rege collatus fuerat) secretioribus literis Cancellariæ Præfectus vulgò Regentem appellant, non minus fide Principi quam facilitate cæteris satisfecit. In reliquis, aula morum iudex & magistra, quæ natum ad magna quæque ingenium erudiuit, modum ad altiores gradus & viam monstrauit. Et Rex Sigismundus collo-

lato

lato ei titulo Secretarij Maioris, non tam hominem
quàm honorem cohonestare visus est.

C A P V T VII.

De adeptione tituli, Secretarii Re- gni Maioris.

HIS moribus iam abundè claro, & prospera vi-
genti fama Zadzicio, Diuus Sigismundus III.
Maioris Secretarij Regni titulum dedit, solis Eccle-
siasticis tribui solitum, cum prærogatiua inter Offi-
ciales Curix primaria quasi, nam & Referendarios
antecedit, & secretioribus Senatus consilijs, à qui-
bus Castellani minores excluduntur, quamuis stans
à tergo Regis absq; sella curuli, interest: & proximus
semper est vacante aliqua Ecclesia Episcopalis digni-
tatis atq; muneris Senatorij. Veteri etenim Ma-
iorum nostrorum statuto quotquot Episcopi ritus
Romani in Polonia sunt, Senatum omnes ingredi-
untur, primumq; locum non modò ibi sed vbique
etiam occupant. Illosq; primos, in custodia & tu-
tela legum & Patriæ antiquitus habere voluerunt
Maires nostri, quos Deus ipse Ecclesiæ suæ Præsi-
des,

des, custodes & vigiles destinauit. Ad eum igitur gradum promotus, ita consilia, ita vitam instituebat, vt & Principi gratus haberetur, & omnibus qui sua opera ex tam numerosa Nobilitate Regni vterentur magnopere charus. Namq; eius domus (tribus ferè lustris hoc officio Secretariatus durante) veræ pietatis, iustitiæ, elegantia, virtutumq; omnium officina, cunctis patebat: superbia, libidine, audacia, simulatione, liuoreq; penitus exclusis. Natura siquidem & institutione ad pietatem formatus inciderat in tempora sapientissimi Regis Sigismundi III. qui Religionem colebat vt Numã, animo & fortitudine munitus erat vt Scipio, prudentia instructus vt Q. Fabius, grauitate vel ipsum Catonem superabat, seueritateq; ac iustitia Torquato etiam superior fuerat. Igitur ab exemplo tanti Regis, & tam moderatè ac feliciter imperantis, modestiam in verbis, & tota vita pietatem, religionem, facilitatem, prudentiam, nec non grauitatem morum, constantiamq; in proposito, æquitatem in decernendo, frugalitatem & prouidentiam in viuendo, aliasq; plurimas dignas Sacerdote Christiano virtutes facillimè didicerat. Ita enim natura comparatum est, vt qua in aula multi præclari, virtu-

virtuteque, & rerum gestarum gloria insignes Viri floruerint, Rexque ipse ad omnia exemplo eis præluceat, ex eadem sequentibus etiam Fata ipsius annis, complures vestigia eorum cupidissime persequantur, Regisque tam illustris vitam inculpatam & laudabiles mores, libentissime in se efformare studeant.

C A P V T VIII.

De asssecutione Episcopatus Culmeñ.

Rectè à maioribus nostris institutum, vt inter Secretarios Regios in Aula, Ordinis sacri viri, publicis perpetuo insuescerent, ac inniterentur negotijs. Et Cancellariorum Referendariorumq; Regni, alter semper Spiritualis esset, quo publicis eruditi atq; exerciti functionibus, pares Episcopali Senatorioq; muneri euadant. Alias enim si inexperti & politiæ rudes, ab Ecclesiarum Collegijs ad tanta sacerdotia accerferentur, licet in Ecclesia boni forent, at in Repub. tyrones, infanteq; essent: qui nihilominus principem in Repub. & Senatu locum tenent. Atq; hinc legendi nominandiq; Episcopos vetus mos in Polo-

nia ad Regium delectum, qui genium vniuscuiusq; ac indolem è suis ciuibus longam per experientiam nouit, tam inter seculares, quàm Ecclesiasticos viros. Vnde & sapientissimus Rex Sigismundus III. exactiori cura in Senatum viros ex ordine sacro quam prophano legere solitus, Iacobum Zadzicium, vltra quinque lustra in Regia sua versatum, & plusquàm tredecim annos Maioris Secretarij officio functum Episcopum Culmensem nominauit, & si omnium ferè bonorum gaudio, qui eius virtuti & meritis favebant, tum maximo certè Borussia incolarum desiderio: qui virum omni politiori literatura perpolitum & humanitate profusiori omnibus in Regia gratum iam dudum suspiciebant. A quo enim tempore ad publicas & Ecclesiasticas functiones manum & animum admouit, nullam non virtutem maximis in laboribus & sudoribus versatus, ita coluit, vt in ea non excelluerit. Præcipuè dum Regentis Cancellariæ simul & Secretarij Maioris munus obiret, singularem industriam in negotijs tractandis, sedulitatem in studijs hominum promouendis, comitatem facilitatemq; in excipiendis ciuibus accurrentibus ad Aulam mirificè seruauit. Et abhinc statim summam si-

bi non

bi non modò Serenissimi Regis gratiam, verùm etiam omnium hominum & ordinum benevolentiam comparauit. Ingressus igitur Episcopatum, præclaris naturæ dotibus vel præcis illis Patribus non inferior, postquam Iurisdictionem suam fundauit, & omnia ad præscriptum disciplinæ Ecclesiasticæ composuit, quo defatigatum tot curis animum, post Aulicas curas, & vicissitudines rerum, ad serias Spiritualis vitæ meditationes disponere posset, in Italiam per Imperij Germanici prouincias excurrere statuerat. Et iam Monachium in Bauaria peruenerat, cùm interim nunciatur ei Gustauum Sudermanum in Prussiam irrupsisse, bonaq; & possessiones Ecclesiæ suæ deuastasse: & ni maturè subueniatur, omnia in nihilum redigi facile posse, partim hoste excurrente, partim milite Polono vniuersa depopulante. Quapropter Patriæ ruina & proprio damno motus, Romanæ peregrinationis consilium mutauit, inq; Prussiam ocissimè reuersus, toto expeditionis tempore lateri Regio in castris adhæsit: ac tandem fatigatis bello vtrinque partibus, tractandæ cum hoste pacis cum alijs viris illustribus author Regi fuit. Destinatusque ad conficiendum negotium metquartus, inducias

sexennales cum Suecis conclusit: pro merito à bonis omnibus gratiam, ab hostibus etiam inuitis laudem, à Deo immortali laboris præmium.

C A P V T IX.

De obtento munere Procancellariatus.

Senatum ingressus Zadzicius, in eo consummatae prudentiæ theatro parem se magnis negotijs, statim probauit: Adeò enim scitè ac sapienter, tempore tractationis pacis cum hoste, de Suecicarum rerum statu, de Principum confœderatorum ingenijs, de facultatibus, ac moribus Regnorum inter se concertatum, deque ciuitatum maritimarum, ac populorum contra nomen Polonum insurgentium, atque tota pacis ac belli ratione disceptarat, vt diuersorum Regum legati, qui inducias illas Suecis persuaserant, aduersarum pariter ac secundarum rerum vsu edocti, neminem eo sapientia, iudicio, memoria, ac omni denique summa virtute præstantiorem esse faterentur. Quapropter Varsauiam ad Comitata reuerso, vniuersa Respub. gratias egit, quòd non armis publicoq;

blicoque periculo, sed diuina ingenij virtute, exoptatam pacem affectæ patriæ peperisset. Pestilentia siquidem atrox ac repentina, quæ vulgatis minimo contactu morbis, cumulatîsque subinde multorum funeribus, non modò castra, verumetiam vniuersam Prussiam, Masouiam, Maioremq; Poloniam vastârat, magnos adminitrando bello difficultates afferebat: afflictis scilicet ancipiti periculo militibus, qui neque in agrum clementioris & liberioris cæli ad tuendam salutem euadere, propter hostis propinquitatem, neque in castris exitiabili eius morbi contagione fædatis, supremi discriminis metu consistere audebant. Cæli quoque rigidioris inclementia multos ægrotos abstulit, quos ob luem inficientem alios, nemo sub tecta recipere volebat. Hos itaque pariter ac pauperes agricolas, annona laborantes, in ditione sua Lubauensi opportuna liberalitate Zadzicius subleuauit: nihilq; vehementiùs, factus Episcopus contendebat, quàm vt nemo è subditis sui Episcopatus calamitatem, & fortunæ aduersæ mala, vel incommoda belli pateretur. Quapropter eum Rex sapientissimus, post exactos in Curia viginti annos Vicecancellarium Regni, Anno Christi 1627.

crearat, qui est honos singularis in Senatorio ordine amplissimæ ac opulentissimæ dignitatis. Quo suscepto ab elegantia eruditorum morum auctiorem gratiam promeruit, donatus aliquot pinguioribus Sacerdotijs, clarioremq; subinde nominis famam apud omnes est consecutus. Iustitiæ siquidem ac pietatis diuinarumq; ceremoniarum cultor fuit semper religiosissimus, Patriæ libertatis, Ecclesiasticæ immunitatis, maiestatisque Regiæ, pro suo officio defensor constantissimus, atque demum præcipuo pacis seruandæ studio, & singulari omnis generis munerum abstinentia clarissimus. Quibus moribus tametsi singularem ab omnium ordinum hominibus gratiam maturè collegerat, priusquam adhuc Senatum ingressus fuisset, inuidia tamen moras progressibus suis necente, tardius paulò annulum Reipub. accepit.

C A P V T X.

De munere affecuto Supremi Cancellarii Regni.

A Dscriptus in Amplissimum Sarmatiæ Senatum Zadziçius, non minus ex eo accepit, quàm eadem

dem contulit ornamenti. Siquidem & in summis rei Polonæ difficultatibus, ad pacem cum Suecis componendam missus, tantum muneris pro voto egit, & Pontificijs virtutibus, puta religione, innocentia, vigilia, eruditione & grauitate domi forisq; insignis apparuit; & Procancellarij munere ornatus, cum nec ambisset, neq; quicquam cogitaret minus, annulum Reipub. maiorem accepit illustre & vltimum munificentissimi Regis Sigismundi in se collatum beneficium. Quod sanè munus quemadmodum gesserit, diu spectatæ prudentiæ & probitatis laudem adeptus, in omnium oculis, manibus, & notitia positum est. Nihil enim sibi antiquius duxit, quàm vt officij istius magnitudinem & grauitatem, integritate fidei, iuris obseruantia & custodia, iudiciorumq; cura sustineret ac tueretur. Et quemadmodum vbiq; summa erga Deum pietate floruit, eiusq; diuino cultui promouendo studuit, ita quoque Ecclesiasticæ libertatis & immunitatis diligens custos eximiusq; vindex exstitit. Priscæ maiorum virtutis ac disciplinæ veræ imitator, nullo nec adumbratæ laudis stimulo, nec priuatæ vtilitatis errore vquam permotus. In expediendis negotijs summæ
facili-

facilitatis, in promouendis benemeritis de Ecclesia & Patria summæ diligentia & conatus: in dicenda verò sententia Senatoriæ grauitatis, pacis & concordia amantissimus, in omni deniq; sermone sapientissimus semper, si quando pulcherrimum liberis ciuibus exemplum dedit, tum Interregni tempore, quando vnusquisq; pro genio suo ex dissidentibus in religione Regem Patriæ dare vellet, & ex potentioribus non nemo pro suo arbitrio nobilitatem in partes & vota traheret. Si quando igitur, tum difficillimo illo tempore & in eo grauissimi officij munere, vsque adeò splendore vitæ munificentiaq; liberalis animi, & denique (quod ad promerendam gratiam vniuersorum, plurimum intereat) vrbana comitate præcelluit, vt eum summi quiq; in Patria Dynastæ, & omnium ordinum ex aula lectissimus quisque adamaret, ipsaque, præcipuè in Conuentu electionis apud Varfauiam, Polona nobilitas studiosè percoleret, sententiam sequeretur, prudentiam canam & pietatem suspiceret. Sed & tempore Moschouitici belli ad Smolenscum, eo præcipuo teste monstratoreq; virtutis & fidei, quisque vel infimi ordinis miles & ciuis, produci ad Regem agnosciq; magnoperè cupiebat, quando
ipse

ipse nemini deesset singulisque ex cohortibus præcipuos quotidie mensæ suæ per ordinem adhiberet. Nihil enim ei erat iucundius quam officio benignè præstito, quam plurimorum voluntates promereri: idque eo splendidius, & ad gratiam parandam cumulatius fiebat, quod sæpissimè non rogatus, quos conspexisset pudore cunctabundos, vel ægrè quicquam sperantes, vltro nominatim appellaret, commendatosque mirificè, ad osculandam Regis dextram producere consueisset. Quin & Moschouitici Proceres tractationi pacis destinati magnopere eum venerabantur, populusque Roxolaniæ vniuersus quum quisque pro ingenio, sicuti studium ferebat, aut excelsæ stature & probi oris decus, aut Pontificiam grauitatem habitumque in illis regionibus nusquam ferè visum decenti incessu & vrbana conditum comitate laudarent, aut denique æquitatis læce in apponendis vtrinque conditionibus temperatum, iudicium mirarentur. Quippe ad eius ori atque oculis tanta vis, tantusque honos inerat, promerendos omnium animos, vt non modo ij quibus neque beneficio, neque iniuria fuisset cognitus, sed etiam hostes patriæ publici, & inimici eius priuati, ea celsitate dignum existimarent. Mirificam enim

amplitudinem istam rarissimo quodam naturæ munere in omni negotio actioneque semper afferebat. Vt enim supra diximus erat amplo corpore, atque eo quidem animi similitudine ad decus plurimum erecto, serena fronte, viuacibus oculis, nigricantibus supercilijs, pleniore ore, eloquentia verò tanta, vt in ea quum expediret Senatoria grauitas, libertas ferè militaris, vrba comitas, optimarumq; literarum, & veterum exemplorum conspersa floribus ad admirationem emineret.

C A P V T XI.

De promotione eius ad Episcopatum Cracouiensem.

TAlibus igitur ac tantis dotibus præditum, Vladislaus Rex, Patri Sigismundo in solum succedens, non minus honoribus ornandum putauit, quàm & Diuus genitor suus dignum fore existimauit, bello præsertim Moschouitico fidelem ac diligentem operam eius expertus. Quapropter ad Franciscum Cardinalem Barberinum scribens, vt eum post luctuosum & immaturum ex hac vita Serenissimi Principis

tipis Ioannis Alberti S. R. E. Cardinalis, fratris sui
charissimi decessum, in Episcopum Cracouiensem
nominatum suæ Sanctitati commendaret, eiusmodi
cum elogio exornauit. *Ille est præcipuum & firmissi-
mum Regni nostri fulcrum & ornamentum: Eo aucto-
re ac moderatore, & cruentum cum Suecis bellum in-
ducijs suspensum, & pax cum Moscho tot seculis injeda
nunc tandem firmissimo amicitie nexu firmata coaluit.
Is alias maximi momenti res cum magno Reipub. com-
modo conficere solitus, ubique integerrimus Senator,
optimusq; Presul & videri & haberi voluit. Triginta
ille annos, continuis pro Reipub. atque Ecclesia Dei
defunctus laboribus, Episcopatum Cracouiensem
beneficio & promotione Serenissimi Regis Vladislai
IV. accepit, summum virtutis & meritorum fasti-
gium, Anno reparatæ Salutis 1635. Quod munus vt
dextrè, prudenter, piè ac religiosè obiuit Cancellarij
onere deposito, testimonium perpetuò duraturum,
cum sua egregia, & Heroica facta dabunt, tum laus
& approbatio eorum, à summa Sede; cui inspectio
omnium fratrum, à summo Pastore Christo commissa
est, motu proprio profecta, cum eum in Breui suo A-
postolico Urbanus VIII. (29. Septembr. anno eo-*

dem 1635.) talibus alloquatur. In Ecclesiasticis Magistratibus decernendis, nulla potest grauior apud Apostolicam sedem intercedere commendatio, quam que virtutum laudibus, & meritorum suffragatione innitur. His dotibus cum te eximie munitum esse acceperimus, ad Craconiensem Diœcesis gubernacula libenter promouimus. Nos sanè eam de tua integritate, vigilantia, & Religionis studio opinionem iam dudum concepimus, ut nullum in presentia cohortationi locum relinquere arbitremur: siquidem que pastoralis tui muneris partes sint, egregie perspectum habes. Eandem in Diuino cultu sedulitatem, eandem in Catholice fidei propugnatione constantiam, eandem charitatis exempla, que in Culmensi Ecclesia continenter exhibuisti, exigit nunc à te populus tue sollicitudini recenter commissus, ut per semitas Diuinae legis ad iustitiæ coronam, que diligentibus Deum reposita est, feliciter perducatur. Cetera ex Nuncio nostro percipiet fraternitas tua, cui nos amanter benedicimus, Deum rogantes, ut pietatis tue vota celestis gratiæ dono, & animarum salute benigne consoletur. Omitto elogia ab Imperatore Romano Diuo Ferdinando II. virtutibus suis attributa, tum à Ludouico XIII. Rege Christianissimo, alijsq; Principibus ac Rebuspu.

Bus publicis Europæis, qui eum à Sereniss. Rege Vladislao IV. ad componendum orbem Christianū, Legatum deputari, Coloniam Vbiorum exoptabāt. Eo quòd felicissimè bis cum Suecis inducias, cum Moscho uitis verò pacem perpetuā nomine Reip. Polonæ conclusisset, fuisseq; dexterrimus in tractandis negotijs Regum suorum. Quo nomine magni æstimabatur & ab Inuictissimo Ferdinando III. cuius sororem Renatam Cæciliam Archiducissam Austriæ, sponsam, verò olim Serenissimi Regis nostri Vladislai IV. confinia Regni Poloniæ ingredientem & luculentissima oratione, & splendidissimo comitatu excipiebat. Anno 1637. die 24. Augusti.

C A P V T XII.

De pietate eius ac Religione in Deum.

VT dies face, ita pietas laude non indiget in Sacerdote: à se clara est; præsertim postquam Põtificalem dignitatem attigisset: & quia Deum spectat, diuinos semper animos occupauit. Et Zadzičius à teneris pietati assuetus, animum quem per varias cogitationes, multiplices sermones, omnigenas

actiones, atque curas publici boni, negotiositas dis-
 spergebat, vna sancta intentione, vnoq; in omnibus
 Deo placendi studio, indidem colligebat. Siqui-
 dem omnia summus iste in Deum affectus in se con-
 tinet: nec quisquam verè bonus aut magnus fuit, qui
 non à terra sustulit animum, & velut Numinis capa-
 cem, æternæ sapientiæ radijs miscuit. Itaque Deum
 Optimum, Diuosq; omnes sincerè potiùs, quàm ine-
 pta garrulitate, cæremonijsuè, aut simulatis precati-
 nibus coluit. Singulis solemnitatibus, diebusq; festiuis
 pio, pænitentiq; animo expiare sese, & Sacrum Missæ
 Officium recitare solitus: Chiragræ verò doloribus
 oppressus, Sacramenti hostiam ritè suscipere & quo-
 tidiana sacra audire. Et quia religione pura & sine-
 ra neglecta, nihil in Repub. præclari, nihilq; solidi &
 constantis, ad perpetuitatem constitui potest: proin-
 de sentinam omnis impietatis, scholas Arrianorum
 Racouientes maximo ausu euertit in Diæcesi sua Cra-
 couiensi, quod pij Antecessores sui tot conatibus ef-
 ficere nequiuerunt, Vilnensesq; Calvinistas acriter in
 Comitij Varfauien. aggressus, vnanimi piorum con-
 sensu & sollicitudinè adiutus vrbe exturbauit, ac Re-
 gio decreto condemnari procurauit. Simili zelo & in
 Prussia,

Prussia, Torunenſiq; vrbe, de Religionis incolumitate & populorum ſalute ſollicitus fuit. Vnde ſupremus eum Eccleſiæ moderator Vrbanus VIII. Episcopam Culmenſem & Pomeſaniensẽ adminiſtrantem Anno 1633. die 9. Ianuarij, ſic alloquitur. *Et publice Catholice fidei cauſa, & priuatim virtutis tue merito te plurimum amamus, neque amare deſiſtemus vnquam, dum laborum, quos pro Religione ſuſcipis, fructus conſtabit. Eum amorem, vt quã luculentiffimè teſtaremur, has ad te literas dedimus, ac dilecto filio Magiſtro Annibali Bentiuolo, intimo noſtro domeſtico, atque Vtriuſq; Signaturæ Reſerendario, qui rubrum Ioanni Alberto Regis fratri, galerum noſtro iuſſu in Poloniam deſert, mandauimus, vt eadem tibi coram, noſtro nomine confirmaret, atque Apoſtolicam benedictionem impertiretur. Nihil Deo gratiùs, nihil Eccleſiæ utiliùs nihil nobis, bonisq; omnibus optabiliùs facere potes, quã vt in eadem, quam ingredi cepiſti, iſiſtas via, remq; Catholicam aduerſus Eccleſiæ hoſtes ſumma ope adiuues. Et iterum 14. Aug. Anno 1627. Vbi Catholice Religionis dignitas eſt propaganda, non ijs ſemper armis opus eſt, que fabriliſ manus in humanis ſucinis cudere ſolet. Igne atque aura Spiritus S. gladius ille anceps fabricatur, quod*

quod est verbum Dei. Celestem sanè palmarum segetem, sacerdotes sibi metunt, qui ubi usus venit, audacter illum distringunt. Hac lucis armatura, quâ munitam iam pridem esse accepimus fraternitatem tuam, opportunè defendi posse existimamus in proximis Poloni Regni Comitij Ecclesiasticam libertatem. Omnino da operam, Venerabilis frater, ne se Ecclesiastica dignitas, in tanta rerum opportunitate desertam esse conqueri possit. Id nostro nomine à tua pietate exiget Venerabilis frater Archiepiscopus Seleucie Nuncius noster, cui eandem, quam nobis ipsis fidem habere poteris. Ad Episcopatum verò Cracouien. promotus sic scribit: (Anno 1639. die 20. Augusti.) Itaque Comitiorum occasione, quæ propediem isthic habenda sunt, fraternitatem tuam de nonnullis rebus, ad Dei gloriam pertinentibus, certiore fieri volumus, per Venerabilem fratrem Archiepiscopum Auenionensem Nuncium Apostolicum, cuius verbis consuetam fidem à te haberi optamus. Veteri autem tue erga nos obseruantie, ac virtutis experimento confidimus, te cuncta ad exitum è sententia perducere, non minùs libenter, quàm sedulo curaturum. Quibus sanè officijs rem promouere studueris, ijs voluntatem nostram fraternitati tue arctiùs obstringes, cui à Patre
luminum

luminum caelestis gratis incremendum precamur, & Pontificiam benedictionem ex animo impertimur.

Gaudebat etenim Summus Pontifex talem Religionis propugnatorem inuenisse in partibus nostris, quem zelus Domus Domini exederet in ista statione excubantem, in qua non commodum priuatum spectare Pastor Pastorum Christus Dominus iussit, sed attendere gregi sibi commisso, vt omnibus benè beateq; viuere liceret. Quapropter eadem pietate cum incredibili charitate erga egenos & pauperes & rarissimo quidem exemplo ostendit, hebdomadatim monasterijs largiendo elemosynas, quotidie verò ostiatim quærentibus stipem. Sed hoc nemini voluit esse notum præter Sacerdotem domesticum hæc distribuentem, qui sibi ea in re fidissimus erat. Oborta quoque in populū sæua fame, malignitate exustæ segetis, singularis erga subditos pietatis specimen præbuit, diuerso frumento ad viginti duo millia modiorum, per domus & familias liberaliter absque omni mercede diuiso. Prouidit & pauperibus piè alendis compluribus in locis ditionis Episcopalis, qui ne vestitu etiam careant, in Xenodochio Bodzantinen. Radlouiensi, Kielcensiq; haud exiguo suo ære censum

feri procurauit. Et quia pietas etiam erga parentes, aut alios sanguine coniunctos officium conseruare, teste Tullio monet, laudemq; perennem vel ipsa pia facta conciliant: ideo retributionem à Domino sperans, in patrio solo Druzbinì, vbi parentes eius sepulti sunt, templum à fundamentis extruxit & dotauit, eorumq; ossa in vnum monumentum intulit, vt qua vixere concordia & mortuù quoque vnà quiescerent. Ac vt quiescerent benè, aram sepulchro addidit & Sacerdotes, qui certis diebus inter sacra eorum Manibus parentarent. Similiter & fratre præmatura morte (quæ semper optima eripit) sublato fecit, qui Vexilliferi Siradiensis dignitate ornatus, eam in tota vita spectatis operibus laudem tulit, vt non magno interuallo ad fraternæ virtutis nomen accederet. Quare fluxam vitæ mortalium imbecillitatem, & rerum incertas vices, intuitus, ne non parato & sibi Dominus superueniret, viuens & vigilans, diuersis in Diæcesibus diuersisq; in templis Episcopatus sui, fundationes pro anima sua fecit, imposito onere perpetui Anniuersarij, vt potè Cracouiæ, Sendomiriæ, Kielcijs, Luceoriæ, Varfauix, Lancitiæ, Plociæ, Vladislauix, Gnesnæ, Posnaniæ, Chelmzæ, & Druzbinì.

Tum pro ædificanda Capella Diuo Ioanni Cantio, proque curanda eius Apotheosi, summam pecuniæ haud contemnendam donauit, quam etiam auxit tabulis testamenti. Diuæq; Claromontanæ Oratorio perficiendo, ad sumptus Lubiniorum fratrum, vitæ innocentia, morum integritate & sanctitate insigni Antistitum in patria nostra, quibus cum semper amicissimè vixerat, aliquot millia florenorum adnumeravit.

C A P V T XIII.

De cura & sollicitudine eius conseruandæ Polonæ incolumitatis.

NON omnis ille bonus ciuis, sapiensq; Confiliarius est, qui vultu virtutem refert, & barba trabeaque sapientiam ostentat: multi enim hominum sunt, qui varias sub simulationum velo formas exprimunt, si cultum inspicias, sanctum existimes; si orationem audias, Satrapam loqui putes; si vitam expendas, militem arbitreris; si iudicium, bubulcum. Illum itaque, illum ego probum Reipub. municipem optimumque Procerem, cum Periandro duco, qui

erga Principem obsequium, erga Rempub. officium, erga vtrumque fidem tenuit, quiq; ad amplificandam vtriusq; gloriam vires contulit, quas potuit. Et Zadzicius noster, vt ex supra dictis de illo patet, Deo religionem, Principi obsequium, parentibus pietatem, benemeritis gratiam & memorem animum, iustis honoribus & honestis officijs persolvere optime nouit, & curauit. Sed maxime Interregni tempore sollicitus fuit conseruandæ Polonæ incolumitatis, ne diuersis ciuium de eligendo nouo Rege opinionibus & sententijs, ad discordiam primo, deinde ad arma & interitum deuenisset. Neque enim vllus alius discordiarum solet exitus esse, inter magnos & potentes competitores sceptri, nisi aut vniuersus interitus, prouinciarumq; vastitas, aut victoris dominatus. Proinde grauis res est, etiam vigilantissimo Rege liberum populum gubernante, dissidens inter se Senatus. Quid vbi spes Principatus? quæ sæpissime ad nefarios conatus praua ingenia perpulit. Proinde Electionis tempore, omnium Ordinum præcipuos, quosuis ad retinendam libertatem, leges, iustitiam, fidem, religionem, & omnem Reipub. tranquillitatem, dulci Suada sua ducebat, & ad conspi-

ratio-

tationem in Serenissimum Principem Vladislau-
 natum apud nos & educatum, eligendum in Regem
 Poloniæ cohortabatur: vel à Summo Pontifice lite-
 ris excitatus (1632. Nouembris 25.) quæ sic habent:
*Nos quidem, qui de Poloniæ incolumitate uehementer
 solliciti sumus, maiorem in modum cupimus, ne tuum
 plurimumq; tui similium suffragium, quibus nimirum
 Dei honor, & vera Reipub. dignitas cordi est, in huius-
 modi catibus desideretur. Ita enim fiet, ut caducis re-
 bus posthabitis, illud tantummodo liberè & constanter
 decernatur, quod è re tum Christiana, tum Ciuili, opti-
 mi Senatores & sapientes Viri esse iudicauerint. Quo-
 tiescunque etenim Comitia Regni Varſauix, aut ali-
 bi celebrabantur, semper Sedes Apostolica scripto ad
 eum Breui, ad tuendam rem Ecclesiasticam eum
 commonefaciebat, ex quo Senatum ingressus fuerat:
 gnarus perbellè, nullam eum publicam consultatio-
 nem, nullumq; Comitium omisſurum: vti nec omi-
 serat vnquam, siue Conuentus fuerint indicti Pro-
 uinciales, siue Generales totius Regni, cogitationes
 suas de ijs rebus, quæ vel prodesſent, vel obessent
 Reipub. cum alijs communicando: eosque ad pro-
 bandum ea quæ dixisset, vel ad improbandum exci-*

tando, cum iuniorum consilijs multa noua, sub nouo Rege proponerentur, ipse verò inueteratam, & à maioribus acceptam Reipub. consuetudinem haud facile mutari exoptaret: non modo stultum & ignominiosum verum etiam impium & sceleratum esse iudicans ea negligere, quæ ad ciues felices & pacatos efficiendos, quæ item ad seditiosos reprimendos pertinent.

C A P V T XIV.

De prudentia illius & grauitate iudicii.

SI præclaras corporis atque animi virtutes cum perpetua rerum gestarum felicitate conferamus, proculdubio Zadzici⁹ noster, nõ æquales modo suos ciuilis prudentiæ laude, sed superioris æui etiam Senatores anteibit. Nam si eos, qui sua ætate in Patria flourerunt, enumerare velimus, liquido constabit, eum omnibus laudatissimis etiã quibusuis Sarmatiæ nostræ Antistitibus fuisse virtutibus æqualem: meritis in Patriã omnibus, qui nunc sunt aut erunt, meritò suspiciendum. Si etenim naturæ illius felicitatem expēdas, quid eius ingenio, vel ardentius ad dicendum, vel acrius ad iudi-

iudicandum, vel facundius ad inueniendum? Quis pari animi suauitate atque constantia, paribusq; iustitiæ ponderibus, vel controuersias disceptauit, vel improbitatem odio habuit, vel virtutem honore persecutus est, vel optimos viros antetulit, aut peccantibus ignouit, recteue currentibus, cursus socium se præbuit? Quis vnquam pari facilitate atque laude, omnes totius eruditionis partes coniunxit & absoluit? Cui tanta Historiarum, tanta Geographiæ, tanta antiquitatis notitia contigit vnquam? Quis sacrarum aut prophanarum omnium literarum, tum Iuris Ciuilis, atque Canonici, absolutam scientiam est assecutus? Sin memoriam examines, quis author seu vetus, seu nouus, quem ille non in promptu habuerit? Ex tot eximijs scriptoribus, quos nobis, vel erudita dedit Græcia, vel huius æmula prodidit Italia, vel olim studijs florentissima produxit Gallia, vel ingeniosa peperit Belgica, vel laboris patiens edidit Hispania: nescio fueritne aliquis author quem non legerit, quem non diligenti studio reuoluerit, aut summam scriptionis memoria non retinuerit? Viguit siquidem in eo supra quam credi par est, admirabilis rerum ac nominum recordatio, tanta felicitate,

vt quæ

vt quæ puer in scholis, ex Poetis aut Oratoribus memoria mandauerat, ea data occasione inter disceptandum authoritatis adstruendæ gratia facilissimo negotio recitaret. Nemo ferè vidit illum nihil agentem: nemo inculpabit quasi ocio & ignauia deditum. Erat enim in eo inexhausta auiditas legendi, scribendi, controuertendi, expediendiq; negotia seu publica, seu domestica; nec labore satiari poterat, aut assiduis occupationibus. Quis autem non facile condonasset tali Viro, si quando animum negotijs externis delassatum iocis aut lusibus relaxasset? At illi pro venatu, pro aucupio, pro alea, pro chartis, pro morionibus, proq; cæteris auocamentis vulgaribus, erat aut frugifera lectio, aut cum erudito viro colloquium, aut rei Oeconomicae dispositio, aut oratio ad Deum. Omnia autem statis horis & diebus, cum Ecclesiae, aut Reipublicae negotia expediuisset prius. Cuncta autem sub eo officia, quæ vel in munere Cancellariae Regni, vel in functione Episcopali, vel in regimine subditorum, domesticorumue administrationem respicerent admirabili ordine constabant. Nihil enim in toto humanarum rerum negotio, domi & foris ipso ordine esse præstantius differere erat solitus.

solitus; quo vno & ipsa inprimis Respub. & actio ciu-
uilis omnis, & domestica disciplina, veluti certissima
compage regerentur. Imperata itaque iussaq; in ma-
ximis minimisq; rebus de scripto exhibant, in consilio
primum eorum qui vsu rerum & prudentia valerent
exactissimè deliberata discussaque. Vnde non est
mirum, quod ex voto plerumque felix euentus se-
queretur, in æconomicis præsertim: vbi ministrorum
fidem & diligentiam in omnibus ad amissum exige-
bat, & per censores quidem spectatæ probitatis, qui
singula pro meritis, ad pœnam & præmium reuoca-
rent. Hinc complures illi fuere Amanuenses, qui vel
ad supplices subditorum libellos, datas responsiones
connotabant; vel expensarum prouentuumq; rationes
in codicillos referebant; vel causas iudicatas compo-
sitasque actis publicis inferebant; vel exempla litera-
rum, quæ in grauissimis Reipub. negotijs aut ipse ad
Principes viros scripsisset, aut ab alijs accepisset, per
volumina disponebant. Vt si quis iustam Patriæ
historiam condere velit, non aliunde vberiore, cer-
tiorèq; materiam desideret: quando ex his bello-
rum causæ, consilia pacis, & rerum gestarum euentus
facillimè deprehenduntur. Maximè cum Moschus,

Turca, & Sueci simul insurgerent, contra nouiter coronatum Inuictissimum Regem nostrum Vladiflaum, quem ille omnibus modis & rationibus ad pacem inducebat. Vt potè, qui plerumq; diceret, nihil commodius ac vtilius videri, quàm tribus propositis hostibus, cum primo pacem pacisci, cum altero autem inducias parare, vt in tertium maximè expedita, & grauiora arma verterentur. Studebat enim tranquillitati, copiæ, vbertatiq; omnium rerum; atque ideo Regem Martios spiritus gerentem continuò, ad pacis studium inducebat, proponentibusq; ei ex assiduis victorijs gloriam identidem inculcare solebat. Bellum ad eius quidem arbitrium, qui istud cupit inchoari, verùm non eiusdem arbitrio componi: cùm enim omnes molitiones sint ancipites, tum bellorum maximè, quæ communi Marte & dubio euentu terminantur. Proinde honestius, & humano generi salubrius, Regem vocari Pacificum, quàm Bellatorem, postquam iam tot fortitudinis suæ ac felicitatis experimenta dedisset. Quamobrem maiorem in dies apud Regem gratiam, exactaq; prudentiæ opinionem apud omnes est consecutus, quam vt plurimum ex alienis iudicijs quæsitar., in proprium sensum

sum & succum conuertebat. Eum siquidem prudentiæ, iudicijq; Senatorij tenorem, vsque ad vitæ exitum constantissimè tenuit, vt non temerè quicquam, tum in Reipub. negotijs, cùm in munere Episcopali decerneret, nisi accitis probatæ integritatis, & peritiæ rerum viris, vt exquisitis separatim omnium sententijs, quod statuendum foret, multorum iudicio probaretur. Sed id tanta dissimulatione expetebat, vt semper alienis exordijs & discursibus animi propositum celaret, atque aptè demum ad id quod vellet, instituto nouo sermone deferebatur. Quoniam eo pacto, nunquam prolato interiore animi decreto, authoritatem suam egregiè retineret, nec ob id persuasione prudentiæ, animi consultorum inflarentur: quando ij alia semper de causa se vocatos, & fortuito demum sermone, in grauiorem consultationem incidisse, humanitate Domini faciliè existimarent. Verùm illos confecto negotio, aut prolata in iudicijs sua sententia, iucundè potiùs, quàm grauius, vel statim in corona, vel ad mensam laudabat, qui feliciter in disceptatione diuinassent, aut pro tribunali cum illo sedentes, sententias suas dixissent. Id quidem iucundiore gratia, quod liberaliter, & nullo

fastu gloriam communicare videretur, eaque mode-
 ratione & temperantia in reprehendenda alterius
 opinione vteretur, vt nullum superbum, aut insolens
 dictum ore, vel gestu prorsus excideret. Ad hone-
 stam verò ab ingentibus curis animi relaxationem,
 literarij otij, fructum & iucunditatem, Bibliothecam
 haud contemnendam habuit, quo raros admittebat,
 idque multa consuetudine sibi familiares, & in qui-
 bus multiplicis doctrinæ copia, cum vitæ ac morum
 integritate certans sibi nota fuisset. Proinde paucos
 ad Reipub. honores, aut Ecclesiasticas dignitates pro-
 mouit, aut Regiæ clementiæ commendauit, nisi
 quos magna integritatis, veræq; pietatis existimatio-
 ne pollere, probè pernoscet. Nec quisquam ab illo
 feruentiori studio promotus fuit, quàm Ioannes Lip-
 ski, cuius par nobilitati virtus, Serenissimi Regis Vla-
 dislai IV. beneficio, è Referendarij munere, ad Sar-
 maticæ purpuræ lucem Culmensi Episcopatu con-
 cesso, tum ad Gnesnensis Archiepiscopatus euecta
 fastigium, clarissima, sed breuissima effulsit; prius
 enim quàm Zadzicius ipse terras reliquit, & in cæle-
 ste contubernium emigravit. Cuius ingenij & elo-
 quentiæ præstantiam, nunquam interitura monu-
 menta

menta testantur: peritiam verò legum, opportunitatemq; consiliorum illius & studium Religionis sepulchrali fide, posthumaque fama disces.

C A P V T XV.

De candore ingenii, & lenitate morum.

MUltis equidem simulationum inuolucris tege-
re, & quasi velis obtendere homines sciunt ad-
genitæ prauitatis indolem; interq; aulicos commu-
nissimè lingua aliud loquitur, aliud tacito clausum
pectore reconditur, maximè cum honores vtilitati
coniunctos certatim ambiunt, & vel simulata pieta-
te Principi, maioribusque Dynastis placere student.
Quos adepti, citò mutant pellem, & ad genium pro-
prium redeunt: sæpiusq; procellosi animorum mo-
tus aliquandiu intus cum modestia luctati, tandem
in altum euecti, cum occasione exitum reperiunt,
vultu illorum tantæ violentiæ vestigijs signato, non
aliter, acsi compressus strangulatusque intra nubes
aer, ruptis valido impulsu carceribus sese explicat, eli-
soque igne sonitum horribilem edit. Non ea indo-

les fuit Zadzio, qui totus candidus, & ad probitatem effectus, adaperto potiùs, quàm latebroso & calido ingenio erat, naturaq; ipsa eos oderat, qui animo ancipiti essent, multosq; recessus & varios anfractus haberent, dissentiente præsertim fronte, in qua præclare apud generosos ac probos, & fides & pudor habitarent. Lenitate igitur atque eleganti vitæ iucunditate, vsque adeò dulcis & comis fuit, vt non Proceribus modò ipsis, quibus cum conuersabatur assiduo, sed infimæ plebeculæ etiam, quæ gaudebat ab eo humaniter admitti, comiter alloqui, & sine fuce aut fallacijs postulata impetrari, seruata tamen gravitate Senatoria Pontificiaq; dignitate, morum vrbantate & affabilitate egregiè placeret. Tanta enim varietate clementiam simul & sæueritatem exercuit, vt delicta familiarium, & subditorum, nunc puniendo pro criminis gravitate, modò faciliè ignoscendo constantem, vbiq; lenitatis & facilitatis famam assequeretur: excandesceretq; subitò, cum insolenter irgeretur, & obstinatè: ex aduerso autem, si quid molliter postulares, ciuili humanitate placidus apparebat, adeò vt is omnium sæuerissimus simul atque lenissimus haberetur. Potiusq; peccantes ab aula
sua

sua discedere increpitos iuberet, quàm vt inhumano acerbiori que aliquo pænitiæ genere afficeret. Et quamuis in cognatos quosdam & affines suos delinquentes, supra æquum seuerior habebatur, humanitatis attamen & candoris eximij laude ductus, dimisit eos potiùs, quàm condignis pænis emendare voluit. Maximas enim iniurias æquo animo ferre solitus erat, & ad multa conuiuendum esse dicebat: ideoque exactissimus delictorum vltor esse volebat, etiam in pænis Clericorum, quæ spiritali corriguntur disciplina.

C A P V T XVI.

De robore & constantia animi illius.

SToici cùm omnia ornamenta, omnes virtutes Sapienti tribuissent, eundem à perturbatione animi, à dolore, & consternatione vacuum esse voluerunt; qui externis rebus ab interna tranquillitate non potest dimoueri; qui sic semper excubat animo, vt ei nulla res improuisa accidere possit, nulla inopinata, nulla omnino noua: qui omnem fortunæ casum aptè & quietè perfert. Talis fuit Zadzicius noster, qui
omnium

omnium virtutum laudibus & exemplis ad imitan-
 dum abundans, etiam inuariabilis animi constan-
 tiam & robur inuictum declarauit, aduersus omnem
 inuidiæ contumeliam adeò permunitus, vt secunda
 pariter ac aduersa vno indomitæ mentis tenore me-
 tiretur. Vnde cùm illi non nemo amicitiam Ducum
 Zbarauiorum (qui in medio virtutum & honorum
 curriculo erepti, acerbum sui desiderium Patriæ reli-
 querunt) nocituram aliquando inſufurraret, impe-
 dimentoq; ad Senatoriam dignitatem & Cancellarij
 munus assequendum diceret; constanti animo re-
 spondit: *Vultum sibi quasi Socraticum semper eundem
 esse, nec orbitam probitatis ambitionis cupiditatisue
 causa deserere velle, sed ita libere sentire nunc, & patriæ
 liberrati consulere, Maioris Secretarij Regni titulo or-
 natum, ac sibi in Senatu fuisset.* Sed & priuati lu-
 ctus & publici mœroris incommodis conflictatus,
 ea magnitudine animi ac patientia compressit dolo-
 rem, vt neque in cubiculum se abderet, neque vllò
 vel tacito gemitu, vel exili suspirio, æquabile illud
 frontis decus immutaret. Præsertim cùm illi mors
 fratris germani nunciaretur, in quo tota spes seruandæ
 domus posita fuerat, aduersa prosperaque ad volun-
 tatis

tatis diuinæ placitum referre solitus Miram quoque fortitudinem animi, & patientiam semper in tolerando omni dolore ostendit, nec virile putabat aut Christianum, in morborum cruciatibus, quos toto penè corpore perpetiebatur, gemitibus vlloué lachrymarum vestigio fædari. Igitur complures annos morbis diuersis exagitatus ad eò obfirmato animo erat aduersus omnes dolores, atque ipsam mortem, vt in agone ipso etiam nulla omnino, vel subtristis, vel perturbati animi signa prætulisse videretur. Et cuiusdam monenti, vt Matris Dei patrocinium inuocaret, eiusque sancta intercessione placaret, mox ad futurum iudicem Christum, *vel de hac re dubitas?* respondit: statimque Litanias Loretanas recitari iussit, graui vultu ac composito, *Ora pro nobis*, identidem ingeminando.

C A P V T XVII.

De liberalitate, & munificentia eius.

Nihil magis Pontificiam Senatoriamque dignitatem decorat, quam si in tribuendis beneficijs suam declaret munificentiam, & in recipiendis

obsequijs ac muneribus, nullam præferat cupiditatem. Hinc auaritiam esse idolorum seruitutem non vno loco dixit Apostolus, ea ratione, quod qui pecuniæ student, totius vitæ suæ spem & fiduciam constituunt in pecunia. Quod in alijs cupiditatibus non fit: nam cæteræ cupiditates singulares sunt, auaritia vna reliquas omnes complexa est. Ac propterea viro sacrato maximè fugienda, vti faciebat Zadziçius noster. Qui aurea, & verè beata mediocritate delectatus, frugi, moderatus, & diligens in re Oeconomica fuit. In exercenda verò liberalitate, qua vna maximè virtute, vel ingentia vitia occultari facile possunt, modum semper tenuit, varia admodum fama, quum in erogando distribuendoque meditata & prouisa largitione vteretur, nec vnquam adduci potuit, vt inconditè largiendo maximè liberalis famam aucuparet. Qui tamen opes semper contempsit, adeò liberali iudicio, vt à subditis supplices libellos auro aliquo insertos quo gratiores fierent, nusquam recipere voluerit, vituperatis, qui inoletam consuetudinem non immutandam esse venenata libidine gauderent. Præterea nullum vnquam sacerdotium venale proposuit, nullum delinquentem pecunia

nia mulctauit. Nusquam census auxit, nusquam corruptus sententiam tulit aut iustitiæ cursum impediuit. Cùmque semel duos ad sessionem turris, ob crimen patratum, per annum integrum in terrorem aliorum condemnasset, eorumque vxores mitigandæ sententiæ causa, per domesticum quendam aureos quadraginta obtulissent, pecuniam nec inspectam continuò illis remisit, & carceris pœnam ad vnus tantum septimanæ spacium duraturam edixit. Sumptuarias rationes censu oppidorum, & frugum prouentu æquabat: ne, vt ipse dicebat, temerè decoqueret. Irridebat enim plerosque in hoc Dynastas, quod liberalitatis & munificentiae famam aucupare volentes largè primum profunderent sua, mox deinde inuiderent, & insidiarentur opibus ditiorum. Alij verò sub prætextu publicæ necessitatis, rapere aliena, & victualia passim per viam à rusticis extorquere satellitibus suis permetterent, vt ab extemporanea, & dissipata liberalitate, militum animos sibi deuincerent. Illi verò contra, præcipua cura semper fuit, paganos & agricolas ab auaritia militum defendere, oppida tueri, exactiones ab illis prouenientes ære proprio exsoluere, licentiamque militarem in hyber-

nis, & in agmine, grauiori fermocinatione, vocatis ad mensam præcipuis capitibus cohibere, atque oblati munusculis insolentiam eorum, à suis subditis auertere: quod Senatorij etiam Ordinis viri, promereri studia militum, vel cum iniuria generis humani oportere censerent. Et quia præclaro gentium omnium consensu, boni studiosiq; mortales, qui in hac vita multis fortunæ lusibus expositos se vident, augustæ virtutis suæ operibus maximè diuturnam laudem petunt; huncq; vnum & summum ex tota laboriosæ vitæ agitatione fructum spectant, vt nominis sui memoria ad posteros nobili perenniq; literarum præsidio, postquam cætera omnia tempus rerum edax celeriter absumat, quàm longissimè proferatur. Idcirco Zadzicius Musis litare cupiens, quas tota vita adamauit, penes Academiam Cracouiensem bonarum artium altricem & matrem, Contubernium Studiosorum, vulgo dictum Hierosolimitanum, à piæ recordationis Zbigneo Olesnicio Cardinali & Episcopo Cracouiensi olim erectum, & vt illa tempora ferebant satis prouisum, nunc autem & parietum humiliatone ad ruinam vergens, & rerum caristia ad solitudinem reductum, tam in muris, quàm
in fun-

in fundatione subleuauit, trigintaque à suo cognomine dictos Zadzicianos alumnos perpetuo foueri iussit, multis millibus eam in rem numeratis. Adscriptis & Diui Cantij Vniuersitatis illius tutelaribus honori non contemnendæ æstimationis, tam in vita quam in tabulis testamenti, summis pecuniarijs. Propinquos præterea, & alienos fouit suis sumptibus, in Italia, Gallia, Belgio & Germania, non tantum nobili genere natos, sed & plebeios, quos hic nominare aut enumerare haud fas putauit, ne gratitudini eorum quidpiam derogare videatur, qui sui benefici patroni, ut existimo, si non scriptis, at certè memori animo liberalitatem & munificentiam, posthumæ posteritati commendabunt. Quamuis enim ille ipse gloriam ex liberalitate petere neglexit, eam tamen ob id certius atque liquidius assequebatur, quod in vita eius nihil absurdum aut impium, quod Pontificiæ virtutis aciem hebetaret, ab austero vel maligno censore notari posset. Nihil enim ei erat antiquius, quam in omni Ecclesiastica, ciuilique actione, religionis decus omnibus commodis anteferre, templorum iura tueri, legibus coercere impios, patriam propugnare libertatem, nomenq; Polonum ornare

ingenijs nobilibus, ordine laudabili & gloria immortalis. Et hinc quæ situs semel, *cur congestam in arcas pecuniam, se viuo in ornamenta templorum, aut subsidia miserorum distribui non pateretur, memor illius dicti Apostoli Pauli: Operemini bonum dum tempus habetis?* Liberali ingenio subito respondit: *falli magnopere eos, qui me ingentem congestisse pecuniam existimant, cum valde mediocris sit, si modernorum temporum estimationem auri nimium valorem censentem prisca consuetudine demas. Quam tamen non cupiditatis, aut auaritie causa asseruo, sed necessitatis Reipub. respectu habito diligenti: quæ si (quod Deus auerruncet) ab aliquo potenti hoste inopinato opprimeretur, in repentina perturbatione omnium, posset facile iuuari, priusquam contributiones indicerentur publice, aut hostis facto aliquo progressu maiorem audaciam sumeret. Ego, inquit, qui pastor ouium curæ meæ commissarum sum, morbis & senio iam confectus, vel fuga salutem, vel de ditione spontanea querere haud possum, neque etiam liceret; conscripto autem aliquo milite derrepente, gregem meum equè, ac me ipsum pro posse defenderem, donec Respub. maiores vires & iustum exercitum collegisset. Quod si verò Numine sancto, à quouis periculo & motu*
patriam

patriam nostram solito protegente contigerit, me tranquillis temporibus vitam cum morte feliciter commutare, pecuniæ villa asseruata, quæ respectu tantæ necessitatis Reipub. valde exigua est, cedit pauperibus, Deoq; dicatis locis, vti & factum est. Verùm tamen non defuerunt grauiora acerbioraq; ingenia, qui Zadzicij famam auaritiæ nomine fugillarent, ignari prodigos & nimium de suo largiendi liberales degenerari facilè ob penuriam in raptores alienorum & oppressores subditorum suorum. Multosq; Principes maximos, non modò Ciues aut Proceres ordinarios natura minimè malos, & bono præditos ingenio, in Tyrannos degenerasse legimus, non aliam ob causam, quàm quod ad paupertatem fuerint redacti. Animus enim excelsus inopia & egestate subactus in aleam mittit omnia. Quare, miserabilem profectò magnorum virorum conditorem existimauerim, quando eorum mores ad arbitrium prodigorum, obaratorum, aut egentium hominum, sæuam potius quàm benignam interpretationem accipiant. Sed erga propinquos & proximo affinitatis gradu necessarios durus & illiberalis fuit? ita vt fratrem germanum, natu minorem, nullo angustiori in Patria titulo aut officio Reipub.

Reipub. exornare studuerit, præter Vexilliferi Sira-
 diensis dignitatem, quæ vnicuiq; nobili Polono ob-
 uenire facile potest; etiamsi nullum in Senatu pro-
 pinquum ne dicam Cancellarij Supremi honore pol-
 lentem fratrem germanum habuerit? Dico, verum
 id esse, & ratione sanè, nam Episcopus bonorum Ec-
 clesiæ rationem reddere supremo Iudici Christo ob-
 strictus est, qui pauperes pane isto nutriendos esse cen-
 suit, non consanguineos ditandos. Cuius rei testi-
 monio ille superiorum Episcoporum profusam libe-
 ralitatem erga propinquos, vti grauem perniciosam-
 que Ecclesiæ, Sanctorum Patrum exemplo, detesta-
 ri erat solitus. Eamq; ob causam, tam amicis, quàm
 familiaribus grauißima censura sacerdotia concessit,
 & locupletare bonos quamuis ac studiosos, nullate-
 nus voluit, ne opibus Ecclesiasticis abuti videretur.
 Nepotes verò ex sororibus & propinquos quosuis,
 seriò monebat, vt pietatem & iustitiam colerent, no-
 biliq; animi decreto existimarent virtute potius,
 quàm malis artibus ad opes & gloriam contem-
 dendum.

C A P V T XVIII.

De cultu & conuictu eius.

ERat in cultu vestituq; moderatus, potiùs quàm elegans vel sumptuosus, quamuis multam vestem ac pelles preciosas habuerit, donatas sibi à diuersis, & vasa argentea, aureaque. Oderat enim luxum, munditias amabat. Proinde & mensarum honos non in delicatis & exquisitis dapibus, sed hilari simplicitate, perenni copia, comitateq; & frequentia conuiuiarum censebatur. Et fortassis aliqui ex antecessoribus eum numerofo famulatu, cultuq; domus, & splendore lautitiæ superabant, sobrietate tamen & abundantia rerum, nescio an aliquis superauerit Zadzicium. Erat enim priuatis in rebus suis domesticisque sumptibus natura & consuetudine minimo contentus, vt pote qui ciuili patrioq; cultu vixerat, frugaliq; & munditijs potiùs referta, quàm lauta mensa vteretur. At cum clari hospites, & præsertim aduenæ virtute insignes occurrerent, nullis vel maximis sumptibus parcendum putabat, præsertim cum in Regia versaretur, Secretarij Maioris priùs, postmodum

modum Cancellarij Supremi titulo conspicuus, ad quem potissimum extranei, suis à Principibus missi, negotiorum expediendorum causa accedere solent, & ex eius genio, Regis ipsius mores & maiestatem æstimare solent. Vt hic omittam diuersorum hominum in Regia multitudinem, quæ semper magnificentia & splendore capitur, & siue vt nos contemnat siue vt suspiciat, facillimè incitatur.

C A P V T X I X .

De Ædificiis ab illo extructis.

Nitorem ac splendorem in ædificijs ac vestimentis seruare, apud omnes gentes decori ducitur, excedere autem in iisdem modum turpitudinis loco reputatur. Quare & Zadzicius Antistes ad decus & ornamentum Patriæ natus, postquam in magnis salutaribusq; virtutibus optimi atque benefici cognomentum facile meruerit, etiam ædificijs extruendis publicis magnanimitatem suam monstrare voluit, nullū principe viro & immortalitatem merito impendij genus dignius reputans, quam quod erogatur in posteros. Igitur in Episcopatu Culmensi,
celeriter

celeriter restitutis, adornatisq; prædijs aut de nouo exstructis aulis, opportuna liberalitate, & priuatæ commoditati, & elegantia publicæ consuluit, præcipuè arci Lubauienti formam addens recentioris architecturæ luculentiozem. Ad Cracouiensem verò translatus sedem, quo commodiores honestioresq; sibi successoribusq; suis mansiones redderet, dirutis antiquis ædificijs noua pleraq; diuersis in prædijs à fundamentis exstruxit, Sczurouia præsertim, Xanis, Radlouia, Lipouecia: reliqua in veterem formam restituit atque exornauit. Sed præcipuè Kielcensis Palatij cultum elegantiamq; mollebat, nisi mors præpropera cæptis interuenisset. Quod tamen sumptu tabulis testamenti destinato perficitur & exornatur, illo superstitite parietibus & tecto ad culmen deducto. Reliquas quoque arces, domus, prædia & oppida, Episcopæ huius restaurare & illustrare aggressus erat, sed mors manū iniecit non sine publico sensu. Varfauiæ attamen Episcoporum Cracouiensium vsui satis magnificentum palatium extruxit, & aliud futurorum Cancellariorum seu Procancellariorum status Ecclesiastici commoditati, urbis decori, documento demum magni animi & in nitidiorē formā suamq; splendorem cuncta redditura pollicentis.

C A P V T XX.

De eius Obitu ac Funere.

PRudenter fané & verissimè, vt omnia mellifluus
 Doctor de obitu proborum virorum: *Mors bo-
 na, est laboris corona, vitæ ianua, felicitatis porta.* Quid
 enim vita hæc? aut quid amæni habet? qui optimè
 de ea loquuntur, cum mimo aut ludo comparant;
 qui intentius & seuerius, addo & verius cum carcere
 aut custodia assimilârunt. A natali nostro die si in-
 spicimus lachrymæ & gemitus sunt, & cum grandio-
 res eorum pudet, suspiria & internæ curæ. Ergo
 qui sanctè, prudenter, temperatè, summa gratia, sum-
 mis honoribus, summa cum dignitate vixerunt, pro
 ijs laboribus, & molestijs, quas hic aut pro patria, aut
 pro Ecclesia Dei perpessi sunt, felicitatis æternæ par-
 ticipes erunt; ad quam per mortem velut per ianuam
 quandam ingressus eis patebit. Nam quemadmo-
 dum nauis sæuissimis diu susq; de que iactata procel-
 lis & fluctibus, tuto deinde in loco conquiescit: sic
 vita nostra, magnis sæpè oppressa & quassata labori-
 bus, id maximè in optatis habet, vt in morte tanquam
 tutissim o

tutissimo quodam portu, omnes suas molestias laborumque deponat. Quibus Zadzicius noster fractus, præmatura adhuc morte (nondum enim sexagesimum ætatis annum expleuerat) & quando sui opera in primis desiderabatur, in terris, vt cælo frueretur, esse desijt: illamque æternæ felicitatis coronam, ad quam omnes anhelamus, perfectæ virtutis perfecto functus munere, properauit die 17. Martij. Anno Æræ Christianæ quadragesimo secundo, supra millesimum ac sexcentiesimum Bodzantini in Arce Episcopali. Eius funus, vt par erat, cum ingens omnium Ordinum, Collegiorum, Sodalitatum frequentia conuenisset, amplissimis exequijs & pompa magnifica, totius vrbis, imò totius Regni Poloniae summo mœrore ac incredibili desiderio celebratum. Luxereque elatum veris lachrymis, cuncti ciuium ordines, non modò propinqui aut familiares. Nam summa æquitate ius dicere, obliuisci factionum, tueri ab iniuria infimos, & quod maximè in Senatore optimo sanctissimoque Episcopo approbes singulari prudentia & liberalitate militum in hybernis manentium rapinas & insolentiam, à miseris agricolis Episcopatus sui atque Oppidanis, auertere erat solitus. Inque omni eximia pru-

dentia, & perfecta pietatis officio, ac moderata regendi clerum disciplina, Radziuilo Cardinali, alijsq; sanctissimis Antecessoribus suis par fuit. Et in tanta morum grauitate qua pollebat, facili aditu, sermonis comitate, magnificentiâq; operum & præclara clementiæ laude, multos ferè ex superioris sæculi Proceribus & Episcopis superabat. Tumulatus est in templo maximo Diui Stanislai Tutelaris Poloniæ & Episcopi Cracouiensis, prosequente in atra veste amicorum & familiarium turba, vbi eum è suggestu Christophorus Sapelius Canonicus Cracouiensis disertissimè laudauit.

In testamenti verò tabulis, quas biennio ante obitum suum confecerat, nullum Christianæ pietatis, & humanæ beneuolentiæ erga suos & amicos officium prætermisit: cumq; euanescente spiritu hora fatalis immineret, ad quam se vocatis Præsbyteris præparauerat, accersito Alexandro Brzeski Canonico Cracouiensi, summo cum pondere verborum, reliquarum rerum suarum dispositionem commisit. Quare ab eius obitu, erogata in egentes, cucullatos, piosq; Sacerdotes & sacratas Virgines, qui perpetuis supplicationibus vacarent, vltra centum & octo florenorum

Polonicalium millia. Confanguineis (computando & supellectilem diuersam) plus quam ducenta millia. Bonis amicis per ipsum testamento legata quadraginta circiter & tria millia, familiaribus domesticis, triginta duo. Pro monte verò Pietatis erigendo, centum quinquaginta millia, proque extruenda Capella, millia viginti.

Literas sicut viuens coluit, candidusq; arbiter extimauit, ita mortuum certatim eadem versu & prosa lamentatæ sunt: quarum subsidio, nobis tantam iacturam, etsi nihil humanum satis sarciri potest, sarciet magna ex parte diu superstes memoria: nam reuera virum, omnium laudum præconia exuperantem amisimus, qui vt moriens viueret, semper vt moriturus vixit, tuncq; decessit, quum eum viuere opus erat. Extat in peristylio ad ædem D. Francisci imago eius ad veram oris effigiem depicta (vbi plurimorum sanè Episcoporum Cracouiensium, cum veris eorum vultibus imagines cernuntur. Latinis elogijs passim res ab illis præclare gestas indicantibus) Ad quam nos etiam, vt patrono beneficentissimo scripta eiusmodi Epigraphæ parentauimus.

CHRISTO REDEMPTORI S.

SISTE GRADVM VIATOR.
ET VEL MODICE MAGNI PRÆSVLIS
VVLTVM CONTEMPLARE.

F V I T I S

I A C O B V S Z A D Z I K
VETVSTA KORABITARVM FAMILIA,
IN SATRAPIA SIRADIENSI NATVS.

Q V I

I T A NAVIM SVAM GENTILITIAM
PRVDENTER DIREXIT,
VT ILLO NAVARCHO
ET ECCLESIAE DEINCEPS, ET REIPVB. NAVIS,
FELICITER VELIFICARET.

IMPERANTE SIQVIDEM SARMATIS
D I V O S I G I S M V N D O III.

MAIORIS SECRETARII REGNI
TITVLVM PRIMO,
ANNVLVM POSTMODVM POLONIAE VTRVMQVE,
MAXIMA CVM LAVDE GESSIT.
C V M Q V E O M N I A F E R E,
SEDE CVLMENSI CONSPICVVS,
PRÆCLARE FECIT,
TVM BELLIS ACERRIMIS PER CIRCVITVM
PATRIÆ O B O R T I S,
PACI CVM HOSTIBVS TRACTANDÆ
D E S T I N A T V S,
FÆDVS PERPETVVM CVM MOSCHOVITIS,
BINAS VERO INDVCIAS CVM SVECIS,
EX VOTO CONCLVSIT,

IN PRIVATA DEMVM VITA,
QVANTVS LITERARVM, IVSTITIÆ,
ATQVE CVLTVS DIVINI
PROMOTOR FVERIT.

SERA POSTERITAS DICET,
CVM AB ILLO PROBITATIS EFFIGIEM EXPOSCET.
HÆC AVTEM, TAM DIV DVRABIT,
QVAM DIV POSTHVMI CELSAS INTER VIRTVTES
GRATITVDINEM NVMERABVNT.

OBIIT ANNO. MDC. XXXX. II. MARTII XVII.
CVM VIX LVSTRA DVODECIM EXCESSISSET.
SEDISSET VERO IN SEDE CRACOVIEWSI
ANNOS SEX CVM DIMIDIO.

Qua quidem subscriptione, imò toto hoc tractatu, licet non sit luculenter expressum, quicquid vir ille eximius ab ineunte ætate, in Repub. pariter, & Ecclesia, ad extremum vsque vitæ actum strenuè atque magnificè peregisset, tu attamen Lector bone hisce contentus dabis veniam tenuitati nostræ, quod rerum omnium quæ in mundo aguntur ignari, ea quæ scire à Viris fide dignis, fama que publica potuimus, ornandi tanti Antistitis causâ pro virili nostro connotauimus. Nam omnes illius laudes vitæ que ornamenta exponere, aut pro rei dignitate tractare adeò difficile, atque arduum est, vt haud scio an quisquam eorum etiam, qui summam eruditionis

peritiæq; forensis laudem consecuti sunt, hoc præstare possit. Sufficit fuisse illum Antistitem, vt ab incomparabili maximarum virtutum cõcursu memorabile posteris eius nomen futurum putem, cùm nemo ferè ætate nostra ipso solidæ doctrinæ canaq; prudentiæ opinione celebrior, nemo sobrietatis & castimoniæ laude ornatior, nemo vitæ modestia, frugalitate, innocentia, atque religione præclarior inter Proceres Regni haberetur. Proinde & aliam Cenotaphio illius in arce Cracouiensi incidendam si videbitur eiusmodi inscriptionem dedimus.

R E G I S Æ C V L O R V M.

GENIOQ; ET VIRTUTI,
MAGNI HVIVS ECCLESIE ANTISTITIS
I A C O B I Z A D Z I K.

Q V E M
NATVRA IPSA, ET DOCTRINA
AD SVMMAM QVÆQVÆ FORMAVERAT,
D I V V S S I G I S M V N D V S I I I.
R E X P O L O N I Æ
MAGNI SECRETARII HONORE PRIMO
MAGNI DEINCEPS CANCELLARII REGNI TITVLO,
ADIVNCTA EPISCOPA CVLMENSI,
O R N A V E R A T.

POST-

POST QUAM VERO
INTER PRÆCLARI SENATORIS MVNIA,
DIFFICILIMIS REIPVB. TEMPORIBVS,
PACEM CVM MOSCHOVITIS,
BINAS VERO INDVCIAS
CVM SVECIS CONCLVSISSET.

V L A D I S L A V S IV.

AD ALTIOREM EVM CATHEDRAM CRACOV.
PROMERITIS PROMOVERAT.

QVO IN LOCO
EVNDEM VITÆ ET PROBITATIS
TENOREM SERVANS,
AFFABILIS, BENIGNVS, MANSVETVS, PIVS,
ATQVE IVSTVS,

ET VT PATRIÆ LIBERTATIS,
SIC ETECCLESIASTICÆ IMMVNITATIS
ACERRIMVS DEFENSOR FVIT.

SED HEV, FVIT.

NVNC VERO CINERES TANTVM
HOC NOBILE MARMOR TEGIT.
GRANDIS ILLA ANIMA CÆLVM EVOLAVIT.
ANNO VIRGINEI PARTVS,
MDC. XXXXII. DIE XVII. MARTII.

V I A T O R

QVI SIC MORITVR, NON EXTINGVITVR.





O D E

MATTHIÆ CASIMIRI SARBIEVII.

Ad Illustrissimum Dominum

IACOBVM ZADZIK

EPISCOPVM CVLMENSEM,

Supremum Regni Cancellarium, cum Pace inter
Polonos ac Moschos ad Polanouiam confe-
ctâ, in Poloniam rediret.






Cribere magnis maximè Vatribus
Orator, alti pondere consilij
Momenta bellorum & la banteis
Eloquio populos in æquam.
Librasse pacem, nos humlli Lyrâ.
ZADZICIANI nominis & sonum
Et culmen infra, nec togatas
Carminibus tenuare curas.
Nec fracta Mosci fulmina prælij
Parum canorâ dicere tibia.
Audemus aut Regum trophæa, &
Laurigeram memorare pacem,
Quam luctuosæ culta Seueriæ
Omnisq̃ue latè ripa Borysthenis,
Et Moschus & nuper Borussus
Compositis tibi debet armis.

Hæc



Hæc & pedestres historiæ dabunt,
 Grandis LVBINÎ, nec venientibus
 Facundus inuidebit annis,
 LIPSCIVS aut faciles GEBICÎ.
 Nos Leniori dicere barbico
 Iussere Musæ, quæ Polanoviæ,
 Colonus oræ per Viasmæ,
 Culta Borystheniosq; saltus.
 Nixus recuruo carmina vomeri,
 Bisterq; canter. Iam video cauas
 Florere valleis & natantem,
 Fruge noua fluitare campum.
 Iam læsa rursus rura nitescere,
 Ridere colleis celsa meti iuga
 Ipsosque messorum agresti,
 ZADZICIVM geminare cantu.
 Tum verò dulci feruere nomine,
 Valles & amnes. Quis Deus otium
 Mutauit è tanto tumultu,
 Quis gladijs iaculisq; falceis?
 Non solus olim iurgia conficit,
 Pugnasq; Mauors; sunt & idonea,
 Bellis & opportuna paci,
 Palladi Mercurioq; tela.
 Rarum cruentis desinit ensibus,
 Et cæde bellum sapius ardua,
 Regem secundauere cæpta,
 Flexanimæ placida arma linguæ,
 Regnisq; fineis quos male noxius,
 Describit ensis certius innocens,
 Metatur in Charta, volantis
 Penna styli, tenuisq; mucro,

Quem Fas, Honesti ducere limites,
 Et inter æqui quem ratio potest,
 Quem norma pernicious gubernat
 Consilij, tacitumque pondus.
 Hæc tela nunquam ponimus, hos Deus
 Mortalitati mentis & ingenij,
 Affixit ensëis nos ab alta
 Eruius alia arma terra.
 Ferro vicissim cadimus & manu,
 Tauris & vrsis scilicet inuidi,
 Ungues cruentare & minaci,
 Vulnere congeminare cornu.
 Haud parua laus est corpore, languidum
 Strauisse corpus, sed potioribus
 Triumphat armis, quisquis hostem
 Parte sui meliore vicit.

**Też Ode z Łacińskiego na Polskie przelożył Żołnierz
 ieden N. Nieborowski.**

Ciebie ó wielki Krásomowco stawia
 Písoymowie przedni, To ná iáwia
 Dátać, ześ Ráda y wymowa Boie
 Surowe w lube przemienit Pokoie.
 Ja z podtym Rymem, dalekim od tego,
 Wydołać stánie Imienia twiego,
 ZADZIKV Zacny, niechcę się tu sławić,
 Tczym wáżniyszym zát áwnego bawić
 Niechcę, Jáko MARS Moskiewski zgromiony,
 Aby me głuche śpiewać miáły strony,

Niechcę

Niechcę Tryumphu śiegąc Krolenskiego,
 I Wienców z Laurą POKOIV godnego.
 Który SIEWIERSKIE Tobie przyznać Grody,
 I gdzie DNIEPROWE pław swoy toczą wody,
 Musz, y Moskal, y Prussak do tego
 Ze się z Pokoju cieszę sześć letniego.
 To smiału wstawi Látopis uczony,
 Wielki LVBINSKI, y w mowie ćwiczony,
 LIPSKI nie będzie zayrzat z GĘBICKIMI,
 By to słyneło czasy potomnemi.
 Mnie na wojniyszym kazaty Bårdowie,
 To MVZY zagrąć, coby w tamtey stronie.
 Oracz powtarzał, kędy Wiazma leży
 Gdzie DNIEPR przez knieie Polanonskie bieży.
 Jdac za Socha z krzywiona wesóło,
 Widzę kwitnace niziny w około,
 Bayne we Zboz, Niwy się odziaty,
 I suche toczą iak na morzu waty.
 Musz się wesela Polá zaszienane,
 I gestym snopem Pągorki odziatane,
 A Rym nie składny Zence Sielaniná
 Imię LADZIKA co raz przypomina.
 To Imię, słyśac Rzeki y Doliny
 Ozywiał się, BOG sam á nie inny
 Odmienił woynę w Pokoy ulubiony,
 A miecz na Kósę przekował skrwáwiony.
 Nie sa pod władz, MARSÁ, mszytkie Boie
 Ma swe orężę woyná, ma Mir swoje
 Należy PALLA do tey spráwy, Tego
 Trudno odsadzić Trámy MERKVREGO.
 Rzadko się ostrá szábla kończy woyná,
 Ale naywięcey Porádá Spokoyná,
 I Bronń tezyká ktora serc dobywa,
 Páńskich zaciągów często skutkiem bywa.



Te ktore Bronia czyniemy Gránice
 Nie rozstrzygáia watpliwey roznice,
 Nie winny koniec ostrzá Piorkowego,
 Lepiey dokaze ná Pápiérze tego.
 Gdzie samá sfaśnoś kóło kopcow chodzi,
 Kedy się práwo y z uczynym zgodzi,
 Gdzie rozum cáty z Rozsádkiem pánuie,
 Gdzie zdrowa Rádá z Powagá przodkuie.
 Tamy Broń pewna: Tá Bog smiertelnego
 Opátrzył, Bronia dowcipu mádrago.
 Ale my tego nic nie umázamy,
 A z wnętrza ziemie Broni zásiegamy.
 Robiemy Ręká, robiemy Zelázem,
 Snać zayrzac Bydlu y Niedźwiedziom rázem,
 Ze nie brodziemy we krwi páznokciámi,
 I Raz sówitych nie czynim rogámi.
 Ieśczenie bárzo ná Stáwie wtyie,
 Kto słábey Gliny, Glina też pozynie,
 Wietšy nierownie Tryumph ma Ten, ktory
 Robi tá Czástka, ktorey zásiagl z Gory.



